


整定四

全書總目 史部



欽定四庫全書總目卷七十二

史部二十八

地理類存目一

華陽宮記事一卷

浙江汪啟淑家藏本

宋僧祖秀撰祖秀蜀人靖康元年閏十一月汴京

陷時隨都人避兵良岳因記其邱壑池館之勝叙

述極詳末歸其過於朱劬梁師成而推原禍本於

蔡京王侂東都事畧全載之此本蓋卽從侂書錄

出也



良嶽記一卷

編修汪如藻家藏本

宋張湜撰湜有會稽續志已著錄是書取徽宗御製良嶽記及蜀僧祖秀所作華陽宮記各摭其畧首叙朱劬擾民之事又稱越十年金人南侵臺榭宮室悉皆拆毀官不能禁其大意亦與祖秀同

故宮遺錄一卷

兩淮馬裕家藏本

明蕭洵撰洵廬陵人洪武初為工部郎中奉命毀元故宮因記其制度洵後為湖州長興令欲刊未果其本歸於呂山高氏家洪武丙子松陵吳節從

高氏鈔傳萬曆中武進趙琦美得之以張浙門家鈔本互校因行於世其書序次典核朱彝尊曰下舊聞全載之故今不重錄焉

右地理類宮殿疏之屬三部三卷皆附存目

新定九域志十卷

浙江汪啟淑家藏本

此書與宋王存等所撰元豐九域志文並相同惟府州軍監縣下多出古蹟一門詳畧失宜視原書頗為蕪雜蓋卽晁公武讀書志所云新本朱彝尊跋以為是民間流行之書者也首卷四京及京東

東路俱已闕次卷亦有訛脫彝尊曾見崑山徐氏家藏宋槧本所紀闕文與此本同蓋即從徐氏錄出者張湜雲谷雜記稱南渡後閩中刻九域志誤改睦州為嚴州今檢毛晉家影鈔九域志舊本睦字未改而此本則已作嚴州足知其出於南宋閩中刊本而古蹟一門當即其時坊賈所增入矣王士禎居易錄載所見九域志與此本合而誤以為即元豐經進之書則亦未見王存原本也

歷代地理指掌圖一卷

兩淮鹽政採進本

舊本題宋蘇軾撰始自帝嚳迄於宋代為圖凡四十有四前有有序後有總論其序云據元豐九域志然書中乃有建炎二年改江寧為建寧府紹興三十二年升洪州為隆興府諸語案費衮梁溪漫志曰今世所傳地理指掌圖不知何人所作其考究精詳詮次有法上下數千百年一覽而盡非博學洽聞者不能為自足以傳遠何必托之東坡其序亦云東坡所為觀其文淺陋乃舉子對策手段東坡安有此語最後有本朝陞改廢置州郡一圖乃

有崇寧以後迄於建炎紹興所廢置者此豈出於東坡之手哉云云則此書之偽南宋人固已言之而流傳刊本仍題軾名刊胡安國春秋傳者皆摘其列國一圖為冠亦仍題曰東坡謬之甚矣其書雖簡明而踈畧殊甚費衮所稱殊為過當亦不足據也

寰宇通衢一卷

內府藏本

明洪武中官撰案黃虞稷千頃堂書目曰寰宇通衢一卷洪武二十七年九月書成先是太祖以輿

地之廣不可無書以紀之乃命翰林儒臣以天下道里之數編類為書其方隅之目有八所言皆與此本合

輿圖記叙二卷

江西巡撫採進本

明桂萼撰萼有桂文襄奏議已著錄是編即嘉靖八年為大學士時所上首為總圖次則兩京十三省各為一圖附以四夷圖但畧具兵馬錢糧之總數併府州縣衛之名亦不具列所述利病亦皆敷衍之詞其奏進疏乃稱披此圖如祖宗之親歷地

方者然世宗批荅亦稱其明白要切具見體國經濟皆不可解也

志畧十六卷

編修汪如藻家藏本

明廖世昭撰世昭福建懷安人正德丁丑進士官國子監博士是書首題南京兵部武庫司刊行蓋當時官本前載周禮職方氏九州全文其後每省為一圖而終以四裔各畧載其沿革山川人物古蹟土產舛訛缺畧殊無可觀其四裔一卷傳聞附會尤多失真地志中之最劣者也

皇輿考十二卷

副都御史黃登賢家藏本

明張天復撰天復號內山山陰人嘉靖丁未進士官至雲南按察司副使事跡附見明史文苑傳其子元怵傳中是書取閩本志畧稍加潤飾其自序云文襄桂公輿地圖志官諭念庵羅公廣輿圖司馬許公九邊論詞約而事該故往往引三家之說冠於篇端文襄桂公者桂萼念庵羅公者羅洪先司馬許公者許論也其大意在規明一統志之失但貪列人物依然挂一漏萬至若四至八到郡縣

沿革皆畧而不詳未為善本

圖註水陸路程途八卷 浙江鮑士恭家藏本

明黃汴撰汴不知何許人是書前列南北二京及各省路途後序道路分合里數遠近其山川夷險亦言之頗詳書成於隆慶四年而猶載廣東至安南驛路蓋未棄交趾以前所設舊站亦樂史太平寰宇記載燕雲十六州之例也

郡縣釋名二十六卷 浙江鮑士恭家藏本

明郭子章撰子章有蠙衣生易解已著錄其書以

郡縣地名一一詮釋其文義文義可通則畧為訓詁如福州則云取百順之名永清則云取邊境永清之類皆固陋之甚至其不可解者則置而不言亦何取於釋名乎

目營小輯四卷 浙江鮑士恭家藏本

明陸化熙撰化熙有詩通已著錄是書以十三省布政司為綱而繫以所屬府州縣衛所凡土貢之宜鹽課之增損屯田之稅鈔悉隨地詮叙至太僕寺行太僕寺并各苑馬寺監馬數增耗及邊關堡

寨之廢置武弁員額駐屯之處多有明會典所未載者前有自序題辛酉仲夏辛酉為天啟元年而書中永平府條下有天啟五年八月現在官兵十一萬七千八十六員名馬騾駝牛五萬三千八百五十二匹隻及所支月餉之數則序作於辛酉書成又在乙丑後矣其曰目營者自序謂取目若營四海之意蓋亦有志時務者也

輿地名勝志一百九十三卷

江蘇巡撫採進本

明曹學佺撰學佺有易經通論已著錄學佺以博

洽聞著述甚富是書則由雜采而成頗無倫次時亦舛訛又多不著出典未為善本

今古輿地圖

無卷數 江蘇巡撫採進本

不著撰人名氏首列明一統圖由明溯元層累而上至帝嚳九州凡為圖五十又別為古今區域總要歷代山名歷代水名辰次分野列國分野天象分野山河兩戒八圖共為五十有八凡明郡縣用墨書而歷代沿革異同俱以五色筆界畫細註又各附說於圖中考錢曾讀書敏求記曰古今輿地

圖二卷起帝嚳九州至元末羣雄悉以明朝區域為總要復以朱界其間標舉歷代地理於上凡古今山水名及一行山河兩戒咸載焉據其所言與此本合惟曾云二卷此不分卷曾云起帝嚳九州至元末羣雄此起元末羣雄至帝嚳九州為小異蓋此書本無卷數曾所藏蓋以篇頁稍繁分為二冊故以二卷著錄又每頁各自為圖不相聯屬裝潢者以時代先後叙之故始自帝嚳耳然書名今古不名古今是自後溯前之明證圖旁亦細註某

圖第幾字則曾所藏本為誤移其次序審矣其書於明代郡縣不能計里開方又不能上測經緯二度其方向皆在影響之間根柢先已不確歷代沿革遂皆從之而移曾以謝莊左傳圖比之非其倫也

天下郡國利病書一百二十卷 兩江總督採進本

國朝顧炎武撰炎武有左傳杜解補正已著錄是書蓋雜取天下府州縣志書及歷代奏疏文集並明代實錄輯錄成編其中采掇舊文同異兼收間有

圖二卷起帝嚳九州至元末羣雄悉以明朝區域為總要復以朱界其間標舉歷代地理於上凡古今山水名及一行山河兩戒咸載焉據其所言與此本合惟曾云二卷此不分卷曾云起帝嚳九州至元末羣雄此起元末羣雄至帝嚳九州為小異蓋此書本無卷數曾所藏蓋以篇頁稍繁分為二冊故以二卷著錄又每頁各自為圖不相聯屬裝潢者以時代先後叙之故始自帝嚳耳然書名今古不名古今是自後溯前之明證圖旁亦細註某

圖第幾字則曾所藏本為誤移其次序審矣其書於明代郡縣不能計里開方又不能上測經緯二度其方向皆在影響之間根柢先已不確歷代沿革遂皆從之而移曾以謝莊左傳圖比之非其倫也

天下郡國利病書一百二十卷

兩江總督採進本

國朝顧炎武撰炎武有左傳杜解補正已著錄是書蓋雜取天下府州縣志書及歷代奏疏文集並明代實錄輯錄成編其中采掇舊文同異兼收間有

矛盾之處編次亦絕無體例蓋未成之藁本也

增訂廣輿記二十四卷

兩江總督採進本

國朝蔡方炳撰方炳字九霞號息關崑山人明山西巡撫懋德之子也是編因明陸應暘廣輿記而稍刪補之大抵鈔撮明一統志無所考正自列其父於人物中亦乖體例懋德不愧於人物宜待天下後世記之不可出自方炳方炳自作家傳亦無不可特不可載於輿記也

閱史津逮

無卷數江西巡撫採進本

國朝朱約淳撰約淳字博成餘姚人順治辛丑進士官泰安縣知縣是書以閱史不諳地理無由識其形勢乃考訂往牒正其舛訛各繪以圖前有自序稱首禹貢從其朔也職方所載代有殊名作歷代疆域圖十有一海寓瓜分英雄角逐作歷代割據圖八行臺分建元創明因作省會圖十有七玉門西限長城北起作九邊圖十有一羗人畢至百粵胥通作鎮番圖二鎮蠻圖三神京都燕輪將及焉作漕河海運圖各一古河北播今通淮泗作黃河

圖一文命四敷明堂咸享作域外圖九既有省會必詳分野作天文圖一今考其省會圖內有北直隸南直隸等圖福建省圖尚無臺灣澎湖蓋成於明之末年入

國朝未及改修云

歷代輿地徵信編殘本六卷

兩江總督採進本

國朝錢邦寅撰邦寅字馭少丹徒人是編成於雍正中前無總目不知原本卷帙幾何此所存殘稿題曰前集自第一卷至第四卷叙歷代疆域分合第

五卷至第六卷之上半為形勝紀畧第六卷之下半為水道紀畧以下則全佚焉其考據議論亦頗博辨而脫落斷爛即此所存之六卷已不盡可讀矣

山河兩戒考十四卷

安徽巡撫採進本

國朝徐文靖撰文靖有禹貢會箋已著錄星野之說見於周禮保章氏以星土辨九州之地所封封域皆有分星以觀妖祥鄭康成注云大界則九州州中諸國之分域於星亦有分焉其書亡矣堪輿雖

有郡國所入度非古數也如鄭氏所言以九州爲大限而諸國地域遠於國都者其上應之星自不得盡同是星野不主列國而主乎其地漢書地理志於漢時郡縣畧著梗槩至唐而僧一行又據山河以分於義尤近然其說有云魏徙大梁則西河合於東并秦拔宜陽而上黨入於輿鬼彼此遷就益涉支離特其文辭綜博足以自達所見故後代言分野者悉宗之文靖廣採羣書以爲之註此八卷是也自卷九至卷十四則文靖所續補亦引羣

書爲之注自漢以降星野之書已亡說者徒就春秋內外傳以其所及推其所不及牽合附會皆所不免是書雖詳於考古不涉占驗然博引曲證以資談論則可於實用毫無所當也

古今約說

無卷數 兩江總督採進本

國朝邵元龍編自署曰古九峯蓋松江人其書節鈔古今輿地故實詩文排輯成編漫無體例兼有塗乙空缺處猶未完之稿也

右地理類總志之屬十七部四百三十七卷

內二部無卷數

皆附存目

欽定四庫全書總目卷七十二

史部二十九

地理類存目二

成化山西志十六卷

兩淮鹽政採進本

不著撰人名氏考

國朝雍正甲寅宜興儲大文所纂山西志云舊志成於成化甲午督學僉事胡謚創修則此本為胡謚所撰矣其後有嘉靖周斯盛志萬厯李維禎志皆本此志而增修者也謚四川馬湖沐川長官司人

永樂辛丑進士見太學題名碑修志之時距其登第之歲已五十四年矣

寧波府簡要志五卷 兩淮馬裕家藏本

明黃潤玉撰潤玉有四明文獻錄已著錄是編以舊志太冗乃刪除繁贅定為是編體例簡潔亦康海武功志之亞然武功志藝文散入各類中此則僅存其篇題而文皆不錄則欲矯志乘濫載之失而未免太簡矣

成化杭州府志六十三卷 浙江范懋柱家天一閣藏本

明夏時正撰時正字季爵仁和人正統乙丑進士官至大理寺卿是書成於成化乙未因洪武中徐一夔志及永樂景泰續志增修分封畛山川公署風土學校水利軍政詔赦郵政壇廟名宦科貢人物墳墓寺觀書籍碑碣紀遺十八門所收頗冗濫如載凌雲翰嘲析產小詞之類皆非地志之體其凡例稱引用諸書皆簡節全文或因而足以已意故皆不著所出其大畧可睹矣

建陽縣志四卷雜誌三卷續志一卷 兩淮馬裕家藏本

明黃璿撰璿建陽人是書成於景泰庚午卷首於輿圖之外增以先賢畫像十二傳刻失真殆可不
必雜誌三卷亦璿所作而題曰知非子黃景衡集
景衡卽璿之字見前志劉章目錄序中蓋其書乃
修志之餘摭拾佚事自同於小說家流故署其號
也續志一卷乃宏治甲子邑人袁銛所撰名繼前
志實則體例各殊

毘陵志四十卷

江蘇巡撫
採進本

明王俱撰俱字廷貴武進人景泰辛未進士官至

南京吏部尙書諡文肅是編體例頗詳整惟齊高
梁武雖從斯郡發祥然奄有江東各存國史修郡
志者但可載其軼聞舊蹟以備考徵乃於人物之
首冠以二帝附以諸王揆以斷限之法於義爲濫
蓋輿記務侈土風而不知著書各有體例也

中都志十卷

浙江范懋柱家
天一閣藏本

明柳瑛撰瑛字廷玉臨淮人天順丁丑進士官至
河南按察使僉事初明太祖吳元年改濠州爲臨
濠府洪武三年改爲中立府定爲中都立宗社建

宮室七年又改爲鳳陽此志不曰鳳陽而曰中都
用太祖制也其書成於成化丁未體例龐雜最爲
冗濫

金華府志三十卷

兩淮馬裕家藏本

不著撰人名氏前列成化庚子商輅序稱爲知府
周宗智撰而志中乃載及隆萬時事豈後來又因
宗智之本益以近事耶宗智大冶人天順庚辰進
士

赤城新志二十三卷

浙江范懋柱家天一閣藏本

明謝鐸撰鐸有赤城論諫錄已著錄台州自嘉定
以後建置沿革宋陳耆卿志已具鐸因其體例續
輯此編時台州已陞爲府又析黃巖爲太平縣故
鐸爲太平人云

宏治八閩通志八十七卷

兩淮鹽政採進本

明黃仲昭撰仲昭名潛以字行成化丙戌進士官
至江西提學僉事事蹟具明史本傳其書於輿記
之中較爲詳整然以戶口水利列之食貨門中則
牽強不倫亦創例之未協者也

嘉興府志三十二卷 兩淮馬裕家藏本

明柳珍撰珍儀真人成化丙戌進士官嘉興府知府是編成於宏治壬子以府與所屬七縣各為一志其例皆分二十一門序述參差詳畧失當殊未見體要

宏治湖州府志二十四卷 兩淮鹽政採進本

明王珣撰珣曹縣人成化己丑進士官至右副都御史巡撫寧夏是志乃宏治辛亥珣官湖州知府時所重修初宋談鑰嘗輯吳興志而文頗蕪陋明

景泰間訓導陳碩乃因談志續為一編成化甲午知府九江勞鉞又令郡人張淵補所未備增為二十二卷珣以郡縣續有分析復屬郡人汪翁儀唐應徵陳遠等論次增輯列為三十三目分禮樂射御書數六集舊本因前有勞鉞序遂題為成化志非也

重修毘陵志四十卷 江蘇巡撫採進本

明朱昱撰昱字懋易武進人初成化己丑常州知府卓天錫聘昱修郡志書成未刻越十有三年戊

寅新淦孫仁來知府事仍屬昱增修之其書先圖次表次志凡十有七門昱後序云以宋咸淳志爲本次以洪武十年續志及永樂十六年景泰五年勅天下郡縣纂輯志書之副稿按咸淳毘陵志爲史能之撰洪武續志爲謝應芳撰其原書皆有體例故所修比他志爲善惟命周忱賑荒以王恕爲巡撫諸勅諭不專爲常州一府而牽連載之未免夫於汜濫云

三原縣志十六卷

兩淮馬裕家藏本

明朱昱撰其書分類太繁例多叢脞如戶口列之食貨門參雜不倫縣治官制俱列之公署門亦綱目倒置人物分十七類甲科鄉貢封贈蔭叙悉隸焉而獨以顯達一類別爲一卷冠於前其識趣可知矣遠不及所修毘陵志也

徽州府志十二卷

兩淮馬裕家藏本

明汪舜民撰舜民婺源人成化乙未進士官至右副都御史巡撫鄖陽是書成於宏治壬戌分目過多如沿革之外又出郡名一門人物至分爲十四

類皆傷煩碎又風俗形勝二門皆標題夾註有似類書亦乖體例

常州府志續集八卷

兩淮鹽政採進本

明張愷撰愷無錫人成化甲辰進士仕履未詳初王與撰常州府志四十卷止於成化二十年此續修之凡見於舊志者不錄其叙事止於正德七年則其書當成於是歲後也江南通志載無錫張愷常郡續志八卷與此本卷數相合其所載惟官署人物蓋以沿革山川各門已載前志故也

吳邑志十六卷

浙江巡撫採進本

明楊循吉撰循吉有蘇州府纂修識畧已著錄是編成於嘉靖八年較他志乘爲典核然首叙吳國本末爲史考已非一邑之事又引春秋所載吳事爲經考又併非吳地之事矣仍不免志書牽引之習也

常熟縣志四卷

兩淮馬裕家藏本

明楊子器撰子器字名父慈谿人成化丁未進士宏治中官常熟知縣因舊琴川志而葺之改題今

名卽其標目賢於舊志遠矣

赤城會通記二十卷

浙江范懋柱家天一閣藏本

明王啟撰啟號柏山黃巖人成化丁未進士官至刑部尙書是編取陳耆卿赤城志謝鐸赤城續志諸書彙爲一帙而變其體例自夏后氏迄明每朝各爲一紀唐以後則一帝爲一紀其載官吏則分名宦死難儒臣有事實官無事實官有疵官諸目紀人物則分鄉獻死節孝子烈女鄉儻諸目散入各紀之下又有異聞祠廟鄉試貢薦等目分析破

碎殊無體要至山川分野無可附麗則舉而列之夏后氏紀亦可見其例之窒而難通矣

松江府志三十二卷

內府藏本

明顧清撰清字士廉華亭人宏治癸丑進士官至南京禮部尙書事蹟具明史本傳其書頗詳悉有體稍勝他輿記之冗濫

嘉靖江西通志三十七卷

兩淮鹽政採進本

明林庭棫周廣同撰庭棫字利瞻閩縣人宏治己未進士官至工部尙書諡康懿事蹟附見明史林

瀚傳廣字充之崑山人宏治乙丑進士官至南京
刑部右侍郎事蹟具明史本傳是編乃嘉靖中庭
榻官江西布政司參政廣官按察司副使時所作
凡藩省志三卷諸府志三十四卷藩省志分十三
門諸府志分二十七門體例畧同他志惟姦宄一
門仿諸史姦臣酷吏傳例以示鑑戒獨爲小異史
載廣在正德中以劾錢寧獲罪幾死又載其平生
嚴冷無笑容巡撫江西墨吏皆望風而去其嫉惡
之嚴可以想見此門其廣所創意歟

雍大記三十六卷

浙江汪啟淑家藏本

明何景明撰景明字仲默信陽人宏治壬戌進士
官至陝西提學副使事蹟具明史文苑傳是編爲
所作陝西總志乃其督學時開局立例召學官生
徒分輯成編者訂改甫就景明以病去官僉事周
宗化攝學政爲續成之始末具詳於段昞序中關
中自三輔黃圖以後宋敏求程大昌所作最簡雅
有法景明廣事蒐採意欲突過前人而嗜博務多
如歷代史贊之類槩爲收入未免汜濫又文字多

摹古而失真如改沿革志曰考易改藝文志曰志
賁名目皆出臆創幾於鷗閣虬戶篠驂銑溪七子
未派為世所詬厲亦有由矣

崇安縣志四卷

浙江范懋柱家天一閣藏本

明李讓撰讓天台人官崇安訓導書末有宏治癸
亥崇安縣丞錢塘沈相刻書跋而科第門中所載
乃至正德十四年己卯蓋書成之後又有所續附
也其書凡分五十七門猥雜殊甚卷首列諸儒圖
像自胡安國以下凡十六人皆畧具眉目不可別

為某某僅以題識辨姓名不知何取與建陽縣志
所繪同一鄙陋也

彰德府志八卷

兩淮馬裕家藏本

明崔銑撰銑有讀易餘言已著錄是書成於嘉靖
壬午自序謂本宋相臺志元相臺續志而益以諸
縣之輿記其書頗為謹嚴蓋銑本儒者故也

嘉靖惟揚志三十八卷

浙江范懋柱家天一閣藏本

明盛儀撰儀字德章江都人宏治乙丑進士官至
太僕寺卿揚州輿記宋代有紹熙廣陵志嘉泰廣

陵志寶祐惟揚志歲久散佚高宗本有惟揚新志而採錄未備嘉靖二十年知府歸安朱懷幹請於巡按御史胡植屬儀輯為是書沿寶祐舊名以惟揚為稱且謂禹貢淮海惟揚州寶祐志本此今作維揚者誤也首郡邑古今圖次建革以下十八志又秩官人物二列傳纂次頗有端緒在明代地志中差為完善惟以古今關涉揚州事蹟仿綱目編年紀載別為歷代一志則體例殊嫌剗造

嘉興志補十二卷

浙江巡撫採進本

明鄒衡撰衡嘉善人初宋嘉定甲戌岳珂守嘉禾始命闕棧創郡志未成元至元間郡博士徐頌續為三十二卷明宏治中郡守柳邦用再加纂輯衡復取宋元諸志增所未備其已見於柳志者不錄故謂之志補書成於正德元年卷首並載徐頌舊志唐天麟郭晦二人序蓋欲表舊志義例故存其原序以見端末也

嘉靖安慶府志三十卷

兩淮鹽政採進本

明胡纘宗撰纘宗字世甫自號烏鼠山人泰安人

正德戊辰進士官至左副都御史巡撫河南事蹟
 附見明史劉訥傳是編乃嘉靖元年纘宗為安慶
 知府時所作為記二表二志十二傳十二不分細
 目其門人王漢序之曰今郡縣志分門立類撮要
 標目為類書之體而非史之例是志一循古文無
 復分門立類規規也然第四卷已作職官表第七
 卷又作職官志則於例亦頗不純又顧炎武曰知
 錄曰胡纘宗作安慶府志於正德中劉七事大書
 曰七年閏五月賊七來寇江境而分註於賊七之

下曰姓劉氏舉以示人無不笑之不知近日之學
 為秦漢文者皆賊七之類也是亦好古之過矣

嘉靖廣信府志二十卷

兩淮鹽政
採進本

明費宗撰宗字子和鉛山人正德辛未進士官至
 禮部尚書事蹟附見明史費宏傳廣信自成化初
 始有志嘉靖乙酉宗以編修家居與同郡江汝璧
 楊麟等增修此本凡八門

正德大同府志十八卷

兩淮鹽政
採進本

明張欽撰欽字敬之號心齋正德辛未進士官至

工部左侍郎太學題名碑作通州衛人而此書自署曰潞郡蓋通州爲潞河所經也事蹟具明史本傳是編乃正德癸酉欽官行人奉使代藩時所作凡四十門其沿革門紀大同晉置始興郡後魏徙都平城不知北魏始爲新興至天興中乃徙平城山川門白帝山祇載白登臺爲古蹟不知白登有繁峙宮室武廟諸蹟載於水經注及通典者甚詳又黃河在大同廢東勝州南八里自榆林北塞經此乃折而南書中僅云自東勝界南流至太原往

往失之舛畧蓋邊地少書又倉卒脫稿故也其別立烽堠一門又卷首圖說中有車營戰車諸圖爲他志書所無之例蓋大同在明代爲巖邊故尤詳於武備云

商畧

無卷數 浙江范懋柱家天一閣藏本

明任慶雲撰慶雲商州人正德癸酉舉人官至陝州知州其書首州志次鎮安洛南山陽商南四邑志各分地理建置學校典禮官師選舉人士雜述八門目錄之前有題詞曰今之郡邑古之國也國

可以言語言策郡邑不可以言紀故言畧蓋本之華嶠若文選之典引云爾然國語國策原非地志班固典引亦符命之流引類殊爲紕繆至於華嶠曰畧語出史通亦史志之別名非地志之名也則其書可知矣

澈浦續志九卷

浙江巡撫採進本

明董穀撰穀字碩甫正德丙子舉人官安義漢陽二縣知縣罷官後自號碧里山樵又曰漢陽歸叟居海鹽之澈水鎮嘗得宋常棠澈水舊志校而刊

之因採元明事蹟續成此編小變棠之體例分地理職官公署貢賦兵衛祠宇人品雜記藝文九門規矩在前弗能佞錯較他邑志之冗濫尙有典型然能知棠書之善而必欲改絃易轍稍出入之猶不免明人自用之習故精簡古雅亦終不逮棠書焉

金陵古今圖考

無卷數 浙江范懋柱家天一閣藏本

明陳沂撰沂有維楨錄已著錄是編紀金陵建置自列國以迄明代爲圖一十有五又以城郭規制

隨世異態復作互見圖以辨之每圖並附有說首
有正德丙子自序

金陵世紀四卷

浙江范懋柱家
天一閣藏本

明陳沂撰分都邑城郭宮闕郊廟官署離泮衢市
第宅樓宇山川驛路津梁臺苑陵墓祠祀寺觀識
遺賦咏十八門粗具大畧不爲詳贍沂金陵古今
圖考乃未登第時所作後官翰林侍講時乃續爲
此書隆慶中太僕少卿史際始刊之

隨志二卷

安徽巡撫
採進本

明顏木撰木字維喬應山人正德丁丑進士官亳
州知州明史文苑傳附見王廷陳傳末是志乃木
罷歸後隨州知州蓬溪任德屬木所作上卷編年
紀事始自羲皇迄於明代下卷皆錄詩文雖以隨
志爲名而木籍隸應山與隨接壤志中所載皆合
二邑收之其編年之例全仿春秋經文稱隨爲我
而以地之沿革官之遷除士之中鄉會試貢太學
者按年紀載皆地志未有之例也史稱嘉靖十八
年詔修承天大志巡撫顧璘以王廷陳顏木王格

薦書成不稱旨賜銀幣而已其書今未之見觀於是志亦約畧可知矣

陝西志三十卷

兩淮鹽政採進本

明伍餘福撰餘福字天錫臨川人正德丁丑進士官陝西按察司副使是編成於成化乙未以府州縣衛所寺監為綱而各繫門目於其下如一統志之例陝西為古都會地舊蹟頗多金石尤富諸書記載頗詳其所採摭尙未能詳備

浦江志畧八卷

浙江汪啟淑家藏本

明毛鳳韶撰鳳韶字瑞成麻城人正德辛巳進士官至雲南按察司僉事是編乃嘉靖丙戌鳳韶為浦江知縣時所作分疆域民物官守城社財賦學校人物雜志八門又分子目四十有五較他志頗為簡質而大旨欲仿通鑑綱目以名字爵諡為褒貶又仿尹起莘例自為發明而散署邑人之名已非志體至於正傳之外間有附錄自云仿春秋大全不知春秋大全何與志書之例蓋明之中葉士大夫已如是之陋矣

嘉靖廣西通志六十卷

兩淮鹽政採進本

明黃佐撰林富參修佐有泰泉鄉禮已著錄富莆田人宏治壬戌進士官至兵部侍郎兼僉都御史總理兩廣是編凡圖經二卷表八卷志三十卷列傳九卷外紀十一卷大致頗謹嚴其沿革分野職官選舉皆作表以省簡牘體例亦善惟士官已隸職方命以爵秩而列之外紀非大一統之義寺觀亦列外紀云闢異端然仙釋則入之列傳中不外其人而外其人之所居偵矣藝文苟無關於土風

則可不錄既以其有關錄之而列之於外紀中尤不允也

山東通志四十卷

兩淮鹽政採進本

明陸鈇撰按明有兩陸鈇其一崑山人見明史文苑傳此陸鈇字舉之號少石子鄆縣人正德辛巳進士官至山東提學副使與其兄銓並附見明史王慎中傳是編在地志之中號為佳本體例不務新奇而詳核有法惟海市常變圖稍嫌枝蔓幻化無定之形豈繪畫所可該括耶

欽定四庫全書總目卷七十四

史部三十

地理類存目三

全陝政要畧四卷

浙江范懋柱家天一閣藏本

明龔輝撰輝餘姚人嘉靖癸未進士官至工部左

侍郎是書首陝西省治次自西安府以下分府紀

錄有藩封公署官師戶口田賦河防關隘馬政屯

田諸目末為邊鎮圖於山川形勢關隘汛地道里

遠近皆繪而列之輝初承巡按御史登州浦鎔檄

纂輯全陝政要總督三邊軍務楊守禮為之序後以卷帙繁重復節為此本僅存梗概故名曰畧焉

吳興掌故集十七卷

兩淮鹽政採進本

明徐獻忠撰獻忠字伯臣一號長谷華亭人嘉靖乙酉舉人官奉化縣知縣明史文苑傳附見文徵明傳中是編乃其寓居湖州時所作分類十三曰宦業曰鄉賢曰遊寓曰著述曰金石刻曰藝文曰名園曰古蹟曰山墟曰水利曰風土曰物產曰雜考考訂多未詳審如所載寓賢以作漁隱叢話之

胡仔列入明代尤為舛誤也

廣東通志初稿四十卷

兩淮鹽政採進本

明戴璟撰璟字孟光號石屏奉化人嘉靖丙戌進士官至僉都御史巡撫廣東是書乃璟於嘉靖乙未以臨代之時兩月而成未免涉於潦草其門類亦多未當如人物之外別立道學一門介於學校風俗之間雖本之宋史而於地志為創聞位置先後亦非其所又政紀一門凡歷代竄流嶺表之人皆備書之此自朝政何與輿圖又行次一門惟紀

宋末厓山之事此在史氏為大綱在地志則軼事矣別為標目更未允愜也

平涼府通志十三卷

陝西巡撫採進本

明趙時春撰時春字景仁號浚谷平涼人嘉靖丙戌進士官至右副都御史巡撫山西事跡具明史本傳是書以平涼為西北要地舊未有志因創修之分十七門曰建革曰山川曰戶口曰田賦曰物產曰壇祠曰藩封曰官師曰兵制曰學校曰人物曰孝節曰風俗曰河渠曰寇戎曰寺觀曰祥異其

考証敘述具有史法在關中諸志之內最為有名惜其漫漶磨滅已不可繕寫故僅存其目於此焉

南畿志六十四卷

浙江汪啓淑家藏本

明聞人詮撰詮字邦正餘姚人嘉靖丙戌進士官至湖廣按察司副使明以應天府為南京稱根本重地有京城圖志僅載都城未詳郡縣詮以監察御史提督南畿學政因與南京太僕寺卿陳沂纂輯是書沂即撰金陵古今圖考及金陵世紀者也前三卷為總志分子目凡八次列十四府四州分

子目凡十二採掇尙爲簡核而亦不免於訛漏

湖州府志十四卷

兩淮馬裕家藏本

明唐樞撰樞有易修墨守已著錄是書分土地人民政事三門每門各綴以子目與他志小異然如沿革之中參述祥異體例亦未能精當

嘉興府圖記二十卷

浙江巡撫採進本

明趙文華撰文華慈谿人嘉靖己丑進士官至工部尙書明史姦臣傳附見嚴嵩傳中是書乃文華官通政使時遭憂家居應郡守之請而作分方畫

邦制物土人文凡四門而附以叢記敘述頗有體例其方畫每朝爲一地圖殊可爲法然文華小人之尤其姓名人羞稱之故傳本頗稀此殆毀棄之餘歟

滁州志四卷

浙江范懋柱家天一閣藏本

明胡松撰松字汝茂滁州人嘉靖己丑進士官至南京吏部尙書諡恭肅事迹具明史本傳同時又有績溪胡松字茂卿正德甲戌進士官至工部尙書明史以二人合傳以名姓相同故也是編乃松

官禮部精膳司郎中以使事歸里知州林元倫屬成此志先述天文山川物產各爲一篇次則皆以編年紀事間附論斷與他地志分目者不同然傳記輿圖各有本例以志名而用史體文雖創而義則乖矣

嘉靖全州志六卷

兩淮鹽政採進本

明謝少南撰少南上元人嘉靖壬辰進士官至廣西提學僉事全州置於石晉洪武元年改州爲府九年復爲州領灌陽縣

國朝始以全州灌陽同隸桂林府此志輯於嘉靖己酉其時灌陽爲州屬故各門皆載灌陽也全州舊有志少南重加修輯凡爲綱七爲目五十有八其建置門所載沿革云隋平陳改洮陽爲湘源不知隋改隸永州載於隋書地理志甚詳又不載後周時地屬南唐又洮水出洮陽縣載於水經注亦未徵引均未免脫畧也

嘉靖邵武府志十五卷

兩淮鹽政採進本

明陳讓撰讓字以禮嘉靖壬辰進士官至監察御

史是編成於嘉靖癸卯分天文地理王制人物外志五大綱繫以二十八子目附以三國三表其特創之例在以應候附星野遂使農家占驗冠於郡邑建置之前蓋牽於天文自為一門不得不爾其實分野之說以二十八宿割屬九州既已聚訟以嶺外蠻荒之地引而測驗於揚州益茫然矣揚州占牛女既已疑似邵武一郡而亦占牛女更牛之一毛矣故劉基清類天文分野之書今推步家不用近時李光地注禹貢亦主閩屬揚州之說是猶

楊僕移關耳非篤論也又人物門中別立李忠定世家一篇何李二氏世家一篇亦為創例世家者以爵土世其家也司馬遷以特筆尊孔子蓋以子孫世守其祀顏曾孟以下無不列傳矣李綱等雖曰賢者豈可僭用孔子例乎

嘉靖真定府志三十三卷 兩淮鹽政採進本

明雷禮撰禮有六朝索隱已著錄是編乃禮以吏部考功司郎中謫大名通判時奉檄所修為圖一表四紀四志九傳十五法綱目體大書以敘事分

注以載言又分立諸侯王表帝系傳后妃傳世家傳均與地志之例不合又表傳所載事皆複出尤非體也

嘉靖河間府志二十八卷 兩淮鹽政採進本

明樊深撰深號西田河間人嘉靖壬辰進士官至通政司通政使事迹附見明史楊思忠傳其以深為大同人則因深以軍籍登第也是編成於嘉靖庚子凡十六門分子目六十有一是時天津衛未分為府興濟縣亦尙未廢河間所屬凡州二縣十

六故今天津滄州靜海青縣鹽山慶雲南皮皆併載志中深自序稱一方之山川墳土習俗往蹟咸蒐輯罔遺若夫述怪誕以表奇特著事應以實祥異增仙釋以備觀覽名教之所禁者皆得而畧焉其體例頗謹嚴而採掇古事不免貪多假借附會均所不免仍不出明人地志之積習也

陝西行都司志十二卷 浙江巡撫採進本

不著撰人名氏千頃堂書目作包節撰考節字元達華亭人占籍嘉興嘉靖壬辰進士官監察御史

出按湖廣劾守陵大璫廖斌不法反被誣下詔獄
謫莊浪衛卒於戍所隆慶初追贈光祿寺少卿事
迹具明史本傳此書紀事止於嘉靖且莊浪衛正
陝西地當卽節書矣凡分地理建置官師兵防歲
計人物六門而以所屬各衛分載其中能闕所不
知故簡陋而不荒謬凡例謂學校祀典不立類以
建置大端惟此二事故統置於建置之下例殊未
允自郡縣山川人物以外無一不從建置起能全
附之建置乎

嘉靖貴州通志十二卷 兩淮鹽政採進本

明張道撰謝東山剛正道里貫未詳官貴州宣慰
司訓導東山射洪人嘉靖辛丑進士官至右副都
御史巡撫山東其刊定此書時則官貴州按察司
副使也書頗簡畧以孝義隱逸別於人物之外而
如陸京張伯安諸人又以孝友入人物志亦無體
例也

北地紀四卷 安徽巡撫採進本

明汪來撰來字君復天津衛人嘉靖辛丑進士官

慶陽府知府慶陽為漢北地郡故以名書不分門
 目惟以時代先後為序採事迹詩文之有關慶陽
 者得八十一人以后稷居首次以淳維而自附其
 名於末故實藝文錯雜互編人物名宦混淆並列
 為從來志乘所未有其前三卷題來名而四卷獨
 標北地舉人孫倌撰蓋末卷皆來之文章嫌於自
 炫故託之倌云

括蒼彙紀十五卷

兩淮鹽政採進本

明何鏜撰鏜字振卿號賓巖處州衛人嘉靖丁未

進士官至江西提學僉事鏜以處州舊志十邑各
 為一編體例不當又自成化以後記載闕如因彙
 為是編考隋代始置處州治括蒼縣本以括蒼山
 得名今為處州全府之志不應以一縣冠一郡又
 不應以一山該一境名實相乖於義未允然宋無
 吳郡而范成大為吳郡志則訛誤相沿亦不自鏜
 輩始矣

萬厯開封府志三十四卷

兩淮鹽政採進本

明曹金撰金祥符人嘉靖丁未進士官至兵部右

侍郎兼僉都御史巡撫陝西是書與他志體例畧同惟以仙釋居前官蹟居後而仙釋官蹟之間又介以藝文編次殊為無法

嘉靖仁和縣志十四卷 浙江巡撫 採進本

明沈朝宣撰朝宣字三吾仁和人官江陵知縣此志撰於嘉靖己酉凡例謂義類悉依洪武府志案西湖游覽志云洪武初徐一夔著杭州府志頗稱簡明則所據者一夔本也體例頗謹嚴勝他地志之冗濫其稱杭州府舊志備載詔赦蓋用咸淳臨

安志例不知其時臨安為都城所以備錄明代已非都城即為贅文其說最協至於碑刻之文祇載其目使後世無從考證則失之太簡又引用諸書或足以已意皆不著其所出則益啓杜撰之門矣其書舊未刊板萬厯中諸生鄭圭有抄本為邑令周宗建攜去

國朝順治丁酉錢塘知縣沈某於宗建家求得之邑人朱之浩始為傳寫之浩跋稱其時贅細註畧而不詳尙需增輯云

萬厯湖廣總志九十八卷 兩淮鹽政採進本

明徐學謨撰學謨有春秋億已著錄學謨四仕湖廣習其故事此其萬厯中為左布政使時作也不以州郡分卷惟以事類編輯分三十二門命曰總志其削去各志所書禮樂一門紀事一門以會典通行不為一地而設國史事秘本非外臣所窺其論亦頗有裁制然通行之典制本不專繫於一地刪之可也至於朝廷政令專為一地而發者有詔諭可稽有奏議可考亦有案牘可尋實不待披求

國史然後能知此則欲省編輯之力姑為託詞者矣

定遠縣志十卷 兩淮馬裕家藏本

明高鶴撰鶴字若齡山陰人嘉靖庚戌進士官定遠縣知縣是書自序稱杜門三日而成世無此理或刊本訛月為日歟其記載甚簡畧而體例乃頗冗雜列疆域道路於建置沿革之前是未出縣名先臚縣境所謂四界八至不知為何地而言端緒殊覺倒置至於屯田一門僅四行惠政一門僅三

行又職官題名之下各書其人之字號如書肆官籍之式亦皆非體也

續朝邑縣志八卷

陝西巡撫採進本

明王學謨撰學謨字子揚朝邑人嘉靖癸丑進士官至大同左衛兵備道初正德己卯韓邦靖作朝邑縣志當時號爲佳本學謨此志成於萬曆甲申繼邦靖之志而作故以續名然名爲續邦靖書而邦靖所錄此志仍錄蓋病邦靖之畧而欲以詳贍勝之特以邦靖名重不敢訟言相攻故諱曰續耳

自序謂匠意綴詞稍稍自異其大旨可見觀所敘錄視冗濫之輿記尙爲有法然筆力去邦靖遠矣

三郡圖說一卷

兩淮鹽政採進本

明王世懋撰世懋有却金傳已著錄是編乃其官分守九江道時所作三郡者一饒州二南康三九江皆所隸也凡地之衝僻俗之澆淳民之利病皆撮舉其大端而不以山川古蹟登臨題詠爲重蓋猶有古輿圖之遺法未有世懋自跋稱直指使者東萊趙公命郡縣長吏圖其地境而系說於圖後

既而以所說失實屬世懋改定之故以圖說爲名而不具其圖云

萬厯廣東通志七十二卷

兩淮鹽政採進本

明郭棐王學會袁昌祚同撰棐南海人嘉靖壬戌進士官至布政使加光祿寺卿學會履貫未詳官光祿寺丞昌祚東莞人隆慶辛未進士官布政司叅議是書成於萬厯壬寅凡爲藩省志十三卷郡縣志四十九卷藝文志三卷外志七卷其藩省志輿圖之後卽列事紀五卷茫無端緒惟仙釋寺觀

列之外志較他志體例爲協又增罪放貪酷二門以示譏貶則彷彿嘉靖江西志例也

嘉靖貴州圖經新志十八卷

兩淮鹽政採進本

明趙讚撰讚葉榆人官貴州宣慰使司儒學教授是編成於嘉靖中其凡例謂舊志考究採掇掛漏可笑然此書亦殊舛陋如第二卷內所載題詠每詩皆取一句大書於上而以全詩細字分注於下是何體例也

萬厯四川總志三十四卷

兩淮鹽政採進本

明魏樸如游樸童良同撰提學副使南海郭棐裁
 正之樸如題敘州府同知良題諸生皆不知其里
 貫樸福寧人萬曆甲戌進士官成都府推官是書
 凡省志四卷郡縣志十四卷經畧志附以雜記共
 十四卷文八卷詩四卷其書於尹吉甫商瞿董永
 楊時之類舊志悞收者頗有駁正於趙戒張商英
 之類舊志濫美者亦頗有簡汰惟職官不載守令
 未免疎畧而以先代帝紀列於前亦非輿記之體
 也

安邱縣志二十八卷

兵部侍郎紀昀家藏本

明馬文煒撰文煒字仲韜號定宇安邱人嘉靖壬
 戌進士官至右都御史巡撫江西是志成於萬曆
 己丑體例頗為謹嚴其沿革封建秩官貢舉馳封
 俱列為表藝文惟列古人著述較他志亦為清省
 惟典禮雅樂國家通制非安邱所獨有而各為一
 考此劉知幾所論天文諸志誤學史記者也史記括黃
帝以來故可立天官一書至歷代非各有藝文之
一天無庸複志其說具史通表志篇中
 末附詩二十首文九篇可謂刪除冗濫矣然何不

用范成大吳郡志例散載各條之下乎總記二篇尤多泛濫漢惠帝七年日食于危文帝七年水土合于危後七年有星孛于西方其末指虛此果為安邱垂象耶漢封劉常為安邱侯此就國者也於法當書唐封張說為安邱侯此與安邱風馬牛矣可入說傳不必入安邱志也蓋雖稍廓清地志之惡習而猶未能免俗云

嘉靖江都縣志八卷

兩淮鹽政採進本

明葛洞撰洞字近園江都人初江都以附郭無專

志嘉靖壬戌知縣趙訥屬洞因府志而增葺之凡八門藝文用吳郡志例附各門之內其人物一門則訥所裁定也草創之初記載殊為簡畧每條末所繫論贊皆以知縣趙曰四字冠之是縣令諭示鄉民之體也以入志書不學甚矣

紹興府志五十卷

兩淮馬裕家藏本

明張元忭孫鑛同撰元忭字子蓋山陰人隆慶辛未進士官至左諭德事迹具明史儒林傳鑛有月峯評經已著錄是志分十八門每門以圖列於書

後較他志易於循覽體例頗善末爲序志一卷凡
紹興地志諸書自越絕書吳越春秋以下一一考
核其源流得失亦爲創格

豐潤縣志十三卷

兩淮馬裕
家藏本

明石邦政撰邦政豐潤人其書成於隆慶庚午門
目冗雜絕無義例且於歷代帝王妄爲區別以行
欵高下示其予奪尤爲無理

隆慶永州府志十七卷

兩淮鹽政
採進本

明史朝富陳良珍同撰朝富晉江人嘉靖癸丑進

士官永州府知府良珍南海人官永州府推官永
州志編於成化續於嘉靖朝富謂前志核而簡後
志詳而雜因斟酌其間以爲此志成於隆慶庚午
凡圖經一紀一表三志七傳五惟旣作郡邑紀復
作郡邑表殊爲繁複又人物表一卷自漢訖明第
其差等雖宗漢書之例亦非志書之體

萬厯江都縣志八卷

兩淮鹽政
採進本

明陸君弼撰君弼江都人萬厯中貢生是書因嘉
靖壬戌葛洞舊志重修而以史法變其體例曰紀

日表曰志曰傳紀之目一表之目五志之目七傳之目十夫史之有紀為帝王作也稱之一邑則僭矣其表較他志頗善然既作郡縣紀又作郡縣表其繁複與永州志同提封萬井周制也以名疆域不免鷗閣虬戶之譏其郡縣紀中稱建興中吳主亮使衛尉馮朝城廣陵三年冬十月魏主以舟師擊吳登廣陵故城案吳城廣陵在五鳳二年當魏正始二年曹丕擊吳則在黃初二年先後顛倒三十年何以舛悞至是也

萬厯衡州府志十五卷 兩淮鹽政採進本

明伍讓撰讓衡陽人萬厯甲戌進士官至貴州提學僉事是志成於萬厯乙酉舊本簽題宏治衡州府志誤也凡十一門又各有附錄然如併天文於地理用漢書例可也統詞章於學校是何例乎其沿革門云宋元嘉中以衡陽湘東為王國不知宋時祇衡陽國為衡州地又云唐天寶元年改為衡陽郡不知先已改衡山郡大抵草畧成編耳

天啓贛州府志二十卷 兩淮鹽政採進本

明謝詔撰詔贛縣人萬厯甲戌進士官至四川左
 布政使贛州舊志修於嘉靖丙申天啓元年辛酉
 詔續修之為類十四為目七十九其體例頗為舛
 互亦多錯悞如亭館舊蹟例應敘於古蹟門乃悉
 歸之營建志則古來勝地似悉建於明代矣又鄉
 賢志分行業忠義孝友各門又別立質行一門亦
 未免繁複也

萬厯德州志十二卷

兩淮鹽政採進本

明李櫺撰櫺長洲人萬厯二年以貢生官德州學

正是編為目凡十一明制德州領德平原二縣
 而志惟載本州不及屬邑凡例謂二邑各自有志
 故不載是猶可也於建置志特立坊表一門已覺
 淺陋至寓賢卽屬流寓並非盡通籍之人乃敘於
 官績更為龐雜且德州為漕運孔道山川一門不
 載運河則脫畧已甚矣是書所列職官至天啓中
 止卽學正一官櫺後尙有二十人則又續有增益
 非櫺舊本矣

通州志八卷

兩淮馬裕家藏本

明沈明臣撰明臣字嘉則鄞縣人嘉靖中諸生常與徐渭同叅胡宗憲幕府明史文苑傳附見徐渭傳中明南直隸北直隸皆有通州此編南通州志也書成於萬曆丁丑其秩官科第諸門皆括之以表於例頗善

萬曆應天府志三十三卷 兩淮鹽政採進本

明王一化撰一化里貫始末皆未詳其作此書時則官應天府教授也應天在明為南京而舊無府志萬曆丁丑一化始創是編凡為紀三表九志十

一傳九如郡紀門引金陵志水經注荊州記諸書以證揚州之三江又引括地志以証丹陽之屬秦鄣郡援據頗為該洽又如引宋景定志及通鑑注謂丹陽治所即漢之宛陵亦足證舊志之誤又明會典及明史職官志諸書皆載明封爵惟公侯伯三等志中封爵表詳載孫炎之追封男爵頗足補史傳之缺佚然如靈谷諸寺創自齊梁舊蹟見於景定志建康志丹陽記諸書者甚詳乃遺漏不載則疎漏亦尙未免也

閩書一百五十四卷 福建巡撫採進本

明何喬遠撰喬遠字稚孝號匪莪晉江人萬曆丙戌進士官至南京工部右侍郎事迹附見明史洪文衡傳閩自唐林諤有閩中記宋慶厯中林世程重修之厯南宋及元皆無總志明成化間莆人黃仲昭始為八閩通志王應山復為閩大記閩都記全閩記畧皆草創未備喬遠乃薈萃郡邑各志參考前代載記以成是書分二十二門曰分野曰方域曰建置曰風俗曰版籍曰扞圍曰前帝曰君長

曰文菘曰武軍曰英舊曰方技曰宦寺曰方外曰閩閩曰島夷曰靈祀曰祥異曰萑葦曰南產曰蓄德曰我私其標曰詭異多乖志例扞圍志載兵防及將弁兵士額數而復有武軍志以詳其人文菘志則合職官名宦而為一分併均失其當前帝志載宋端宗及少帝昺端宗雖即位於福州然正史已詳不宜復入志中且帝昺即位於粵之碣洲尤與閩無涉英舊志載人物而復分縉紳弁韜關柝韋布閭巷僑寓裔派為七類轉覺淆雜宦寺志專

載五代林延遇明張敏蕭敬三人亦非志中所應
有蓄德志雜載叢談逸事並及詩話文評於名為
不稱我私志則喬遠自志其宗族雖倣古人自敘
之例而稱名不典語多鄙野其文辭亦好刊削字
句往往不可句讀蓋不能出明人纖佻矯飾之習
明史本傳亦稱所撰閩書一百五十卷
案書實一百五十四卷蓋刊本誤
晚一四字 頗行於世然援据多舛云

萬曆濟寧州志八卷 兩淮鹽政採進本

明王國楨撰國楨字翼廷安邑人萬曆己丑進士

官至濟寧河道副使以州志舊本殘缺屬諸生朱
夢得張維屏分纂而國楨為之裁定列目凡八又
分子目五十僅三月而成書故其間踳駁掛漏不
一而足

南康志十二卷 兩淮馬裕家藏本

明田瑄撰瑄大田人隆慶辛未進士官南康府知
府是書成於萬曆癸巳門目雖繁而條貫有序猶
輿記中之不甚猥雜者

順天府志六卷 兩淮馬裕家藏本

明謝杰撰沈應文續成之杰有使琉球錄已著錄
應文字徵甫餘姚人隆慶戊辰進士官至南京吏
部尙書是書成於萬厯癸巳頗爲簡畧所立金門
圖京兆圖諸名粉飾求新尤明季纖佻之習

萬厯信陽州志八卷

兩淮鹽政
採進本

明劉尙朴撰尙朴信陽人萬厯乙未進士官至山
東布政司叅政先是州人禮部侍郎何洛文撰州
志未成尙朴采其遺稿續作此書凡爲類十九成
於萬厯丁巳序次冗雜殊乖體要

萬厯饒州府志四十五卷

兩淮鹽政
採進本

明陳大綬撰大綬浮梁人萬厯乙未進士官至福
建布政使叅議饒州自正德辛未劉錄撰志以後
百有餘年大綬始撰此志分十三門又分子目八
十書成於萬厯乙卯其中如寺觀之建自唐宋者
應敘於古蹟乃歸於秩祀門二氏非秩祀也輿地
志旣分山水爲二門而古蹟門內又載石城山殊
無條理沿革門載漢建安十五年孫權置鄱陽郡
治舊縣不知初治在鄱陽後徙治吳芮故城亦考

之未詳也

岳郡圖說一卷 浙江巡撫採進本

明黃元忠撰元忠字整菴鄞縣人萬厯中由國子監學正出為岳州府通判是編具述岳州郡城及所屬一州七縣三衛形勝然題曰圖說而此本有說無圖疑佚其半也

海鹽縣圖經十六卷 浙江汪啓淑家藏本

明胡震亨撰震亨字孝轅晚自稱遯叟海鹽人萬厯丁酉舉人由故城縣教諭歷官兵部員外郎是

書凡七篇首方域次食貨次戍海次隄海次官師次人物次雜識蓋與姚士粦叅修而成然不署士粦之名僅見卷首樊維城序中其不曰志而曰圖經者用北宋州縣圖經例也

萬厯容城縣志七卷 兩淮鹽政採進本

明蔣如萃撰如萃字賓王益都人由貢生官容城縣知縣初隆慶間邑令李綦春創為縣志自隆慶三年以後事蹟無徵萬厯甲辰如萃增補為是編凡十類其創立宮室門已失縣志之例又輿地志

所載唐復置縣後罷宋代復置不知五代晉時歸於遼宋時僅置縣於拒馬河此沿革之大者不應脫畧又濡水在縣西亦曰北易水雹水在縣南卽鮑水載於水經注及寰宇記諸書者甚詳亦脫漏不載則其疎舛亦可見矣

萬厯嘉定縣志二十卷

兩淮鹽政採進本

明韓浚撰浚字邃之淄川人官嘉定縣知縣元至元中秦輔之始創縣志明自洪熙至嘉靖凡經四修浚於萬厯乙巳復續爲是編頗勝他志之鄙陋

然亦時有疎舛如以水利列於人物之後已覺不倫以古蹟及寺觀敘於雜記門中更爲非例又如疆域考稱自宋分崑山之東境以置縣不知南畿志載宋割崑山安亭等五鄉於練祁市置縣輿地考載嘉定縣原名嚙城鄉也

萬厯嚴州府志二十四卷

兩淮鹽政採進本

是書爲萬厯甲寅所修首頁題名叢雜無緒或曰主修或曰同修或曰纂修或曰續修或曰彙集莫知撰人爲誰蓋與事者爭欲附名故贅亂如是前

載舊志凡例頗見體裁是志乃不肯遵用之多所更張務求諧俗則其書可知矣

天台縣志二十卷

兩淮馬裕家藏本

明張宏代撰胡來聘續修宏代靈壁人來聘全州人皆天台知縣也宏代書不知成於何年來聘所續則成於萬厯乙卯前十三卷隨事立類為大目十一小目五十有八詩文別為七卷附於後

泰州志十卷

兩淮馬裕家藏本

明劉萬春撰萬春字公孕泰州人萬厯丙辰進士

官至浙江布政司叅政是書成於崇禎癸酉與他志體例畧同而意主黜偽存真頗不徇其鄉曲其論學究而驀理學之堂方技而割隱君之席及諛慕之文雖工不錄者皆切中州郡志書之弊也

萬厯餘杭縣志十卷

兩淮鹽政採進本

明戴日強撰日強蒙城人官餘杭縣知縣是編成於萬厯丙辰分十門子目六十有二中間紀載多舛誤如沿革門云漢高帝時屬荆吳國不知漢時餘杭為西部都尉治仍屬會稽郡城墉門云古城

在今縣溪南莫詳所始不知咸淳臨安志載漢熹平二年所改經兩次遷移至後唐時號為清平軍殊為疎於考訂至第一卷既立山川一門而九卷又別立徑山志既有古蹟一門又別立洞霄志更為冗複矣

萬厯温州府志十八卷

兩淮鹽政採進本

明王光蘊撰光蘊字季宣温州人官至寧國府同知是編成於萬厯丁巳凡為類十二為目七十四頗多舛畧如形勝門祇畧敘舊志數行而梁邱遲

永嘉郡教所稱控山帶海云云祝穆方輿勝覽所稱郡當甌越之衝云云皆未之載此皆失諸眉睫之前學校門祇載梅溪鴈山兩書院而永嘉書院之建於宋時載於王圻續文獻通考者亦不及詳其掛漏可想又治行志中分郡良吏邑良吏為二門體例亦嫌繁碎也

萬厯襄陽府志五十一卷

兩淮鹽政採進本

不著撰人名氏卷首宜城胡價序稱郡守吳公勒成凡為目二十有六明封襄藩於襄陽故敘歷代

藩封別作襄世家一卷於例應爾至以孔子曾適
楚國遂於古蹟之外別出聖蹟一門則冗碎甚矣

清江縣志八卷 兩淮馬裕家藏本

明秦鏞撰鏞無錫人崇禎丁丑進士官清江縣知

縣清江向無志崇禎壬午鏞始創修凡分八目視

他志稍為簡明

崇禎碭山縣志二卷 兩淮鹽政採進本

明劉芳撰芳字百子石屏人官碭山縣知縣先是

萬厯戊午知縣陳秉良屬邑人王文煥撰縣志二

旬而成崇禎己卯芳復與邑人汪用霖續修此編

其沿革載東漢為梁國碭山縣不知東漢時沛國

亦分界其地又云晉省歸夏邑不知南畿志載晉

下邑即碭地非省併也又以下邑作夏邑更誤矣

又分門至四十二率多冗雜如既以水土為一門

又以風俗為一門以古蹟為一門又以八景為一

門殊紛紜少緒也

海昌外志 無卷數 浙江巡撫採進本

國朝談遷撰遷字孺木一字仲木海寧人是志題曰

海昌以海寧為吳海昌郡從古名也書不分卷帙所列凡輿地食貨職官建置選舉人物叢談藝文八門以篇頁計之當為八卷偶未標題耳遷學頗博涉較舊志多所考證而人物瑣分門類典籍不詳卷帙猶沿地志之積習

西寧志七卷

內府藏本

國朝蘇銑撰銑交河人順治丙戌進士由衛輝府推官行取監察御史巡按山西裁缺改補西寧道又調嶺東道是編即其順治十二年官西寧道時所

作西寧在

國初為軍民指揮使司本臨邊之地文獻罕徵故其書亦潦草冗雜絕無體例蓋創始者難工也

續安邱志二十五卷

兵部侍郎紀昀家藏本

國朝王訓撰訓字敷彝安邱人順治丁亥進士官萬全縣知縣是編續馬文煒之書體例相近凡例稱馬志二十八卷今續二十五卷者地理封建本無可續如儷德不至害及一邑則亦畧之惡惡短也

永平府志二十四卷

內府藏本

國朝宋琬撰琬字玉叔號荔裳萊陽人順治丁亥進士官至四川按察使琬與施閏章齊名時號南施北宋而此志不見所長卷端題永平府知府蕭山張朝琮重修其竄亂失真歟

杞紀二十二卷 河南巡撫採進本

國朝張貞撰貞字起元號杞園安邱人康熙壬子拔貢官翰林院孔目是書以安邱東北界接高昌諸邑為杞國舊地爰採史傳之有關於杞者綜其條目曰圖考曰星土曰輿地曰山川曰繫年曰沿革

曰封建曰年表曰世次曰原古曰分國曰系家 案

馬貞史記索隱改世家為系家乃避唐諱此悞襲其名 曰苗裔曰春秋經傳

曰經傳別解曰人物曰遺書曰藝林曰雜綴王士禎序稱其有良史才以安邱一隅上溯太康斟鄩

之故居下迄

國朝數千年事蹟所採之書凡四百餘種可謂勤矣然以為杞之故墟既於繫年錄春秋經文之載杞事者復為年表世次系家不幾於疊床架屋乎且又全錄春秋經傳及經傳別解為四卷不更贅乎

於遺書錄夏小正於人物收姮娥其泛濫抑又甚矣藝林內錄齊風汶水湯湯之詩則以徐州入濟之汶為青州入濰之汶至如振鷺有瞽顧炎武大禹陵詩皆一例採入尤不免地志之錮習也

杭志三詰三誤辨一卷 浙江巡撫採進本

國朝毛奇齡撰奇齡有仲氏易已著錄是編因杭州舊志稱今地本皆江水由隋唐來人力畚築而成因為此辨三詰者一詰秦定會稽郡有海鹽餘杭錢塘富春四縣何以錢塘獨無地二詰西部都尉

為重鎮何以僻處靈隱山中三詰由富春以至海寧無不兩岸平地緣江如綫何以上一折甫接吳山忽西翻靈隱下一折不走龕赭忽北越臨平三誤者一由劉道真錢塘記誤讀漢書西部都尉治武林山武林水所出東入海之文不以西部都尉治為句而以治武林山為句二由不考劉昭註郡國志已駁秦始皇由餘杭渡江之說而仍襲其誤三由江水東合臨浦而劉氏誤以臨浦為臨湖又誤以臨湖為臨平湖又附載宋之問靈隱寺詩吳

越王鐵幢浦二條以為不足辨者不在所詰所辨之數焉

蕭山縣志刊誤三卷

浙江巡撫採進本

國朝毛奇齡撰以蕭山新修縣志踏駁失考因逐各條為之釐正凡沿革之誤二條稱名之誤一條封屬之誤二條坊里之誤二條古蹟之誤三十八條人物之誤三十五條

案毛奇齡此二編本非郡縣志書而列於郡縣志書中者以所刊正者乃郡縣志書猶新

唐書糾繆附於正史之例也

臺灣紀畧一卷

大學士英廉採進本

國朝林謙光撰謙光字芝楣長樂人是編乃康熙二十三年平定鄭克塽以後所作分十三篇一曰形勢二曰沿革三曰建置四曰山川五曰沙線礁嶼六曰城郭七曰戶役賦稅八曰學校選舉九曰津梁十曰天時十一曰地理十二曰風俗十三曰物產而附以澎湖版圖開闢之初規模草創故其文皆畧存梗槩不及新志之詳明然固新志之樞輪

也

登封縣志十卷 內府藏本

國朝張聖誥撰聖誥字紫書號菴菴廣寧人官登封縣知縣初順治五年聖誥之叔父朝端知登封始創修縣志康熙十八年聖誥族兄壘亦知是縣又續增之康熙三十一年聖誥又知是縣復因舊本重修一姓相承遞相纂輯其事頗異書分九門曰圖繪曰輿地曰嶽祀曰建置曰山川曰職官曰方外曰物產曰藝文體例與他志畧同惟他志景必

有八八景之詩必七律最為惡習聖誥力破是例差有識云

琅鹽井志四卷 浙江巡撫採進本

國朝沈鼎撰鼎字枚臣長洲人由貢生官雲南琅鹽井鹽課提舉是書成於康熙壬辰因來度舊志重為增輯首列圖考次分天文地理建設賦役官師學校選舉祠祀人物藝文凡十類

師宗州志二卷 兩淮馬裕家藏本

國朝管楡撰楡武進人官師宗州知州是書成於康

熙丁酉分九圖五紀畧九考四傳師宗舊無志是書草創簡畧粗具大綱附藝文於各門中用宋人舊例惟多錄已作殆成紀遊之集則未免輿記之結習耳

遼載前集二卷 兩淮馬裕家藏本

國朝林本裕撰本裕字益長奉天人是編備

盛京故事自序云折衷於

盛京志前集則仿龍門志乘後集則仿涑水編年今後集未見此其前集也首總論次圖考餘分二十

一門亦頗勤於蒐采然

留都記載而地名仍題前代之稱於體例終為乖迂是亦不檢之過也

揚州府志四十卷 兩淮鹽政採進本

國朝張萬壽撰萬壽字鶴秋浮山人康熙中官揚州府知府揚州府志自明成化至萬壽凡經五修而益繁蕪考書首載萬厯中楊洵舊志序厯敘門目其端緒尚為清整萬壽多所增益其體例轉不及原書也

河套志六卷 江西巡撫 採進本

國朝陳履中撰履中字執夫商邱人官至分巡寧夏兵備道是志成於乾隆壬戌凡河套之建置沿革山川城堡關塞古蹟物產悉分門彙載末附以藝文二卷如引魏書以証涿祁山之為榆林府地引冊府元龜藥彥稠為邠州節度使補五代沿革之闕又証後魏代郡之即漢朔方郡據通鑑注大城之屬朔方以証漢書列傳之大城塞徵引頗為繁富

湖南通志一百十四卷 通行本

國朝大學士陳宏謀等監修湖南省治即唐之武安軍原與荆鄂兼立節鎮宋代亦分荆湖南北兩路至明代始併隸湖廣布政使而幅幘廣濶形勢各殊

本朝康熙三年始析置湖南布政司以控制嶺嶠其後修通志者仍合湖南北為一編又書局開於武昌未免詳近而畧遠故湖南事迹未能賅備乾隆二十一年宏謀巡撫湖南因與藩臬諸臣創修此

志以補其闕共分三十七門其中如山川一門全志每縣祇載數條此則分列方隅職官一門全志文職至知府武職至遊擊而止此則同知通判守備具錄無遺選舉一門全志詳文而畧武此則兩途並登故所載雖止九府四州而卷帙則較全志羸幾十之四五云

續河南通志八十卷

河南巡撫採進本

國朝河南巡撫阿思喀監修河南通志修於雍正九年阿思喀以乾隆三十一年奉

詔纂修一統志徵諸省志書送館乃續修此編事迹皆與前志相接惟前志分四十二目不立總綱此編則分輿地河渠食貨學校武備職官人物藝文八志而各系以子目爲小異云

澳門記畧二卷

安徽巡撫採進本

國朝印光任張汝霖同撰光任字黻昌寶山人官至太平府知府汝霖字芸墅宣城人由拔貢生官至澳門同知考濠鏡澳之名見於明史其南有四山離立海水交貫成十字曰十字門今稱澳門屬香

山縣乾隆九年始置澳門同知光任汝霖相繼爲
 此職光任初作是書未竟至汝霖乃踵成之凡爲
 三篇首形勢次官守次澳番形勢篇爲圖十二澳
 番篇爲圖六考明史地理志祇載南頭屯門雞栖
 佛堂門十字門冷水角老萬山零丁洋澳諸名與
 虎頭山關之類其他皆未記其詳此書於山海之
 險要防禦之得失言之最悉蓋史舉大綱志詳細
 目載筆者各有體裁耳

右地理類都會郡縣之屬一百八部二千四百六十

七卷

內三部
無卷數

皆附存目

欽定四庫全書總目卷七十五

史部三十一

地理類存目四

河源記一卷

編修程晉芳家藏本

元潘昂霄撰昂霄字景樑號蒼崖濟南人官至翰林侍讀學士諡文僖是書紀世祖至元十七年遣篤什西湖河源至星宿海事未有元統中柯九思跋元史已全錄其文此其別行之本也河源遠隔窮荒前志傳聞率皆瞽說惟篤什嘗親歷其地故

昂霄以聞於其弟庫克楚

原作濶濶
出今改正者記為是編

自詫為古所未睹迨我

皇上神武遠揚平定西域揆度水脉規量地形又知篤
什所言仍多疎漏已重為考定勒在鴻編用以祛
萬古之疑而訂百世之謬昂霄是記竟以故紙置
之可矣

浙西水利議答十卷

永樂大典本

一名水利文集元任仁發撰仁發松江人仕至都
水少監明梁惟樞內閣書目云大德間都水少監

任仁發以吳松江故道陘塞震澤汎濫為浙西害
乃上疏條利病疏導之法凡十卷前有仁發自序
又有許約趙某二跋末附宋郊亶及其子喬水利
議約跋稱歲甲辰中書以其議上聞命中書省平
章政事董是役由是震澤無壅與三江之勢接復
朝於海趙某跋稱是錄所載其要有三一曰濬江
河以洩水二曰築堤岸以障水三曰置牖竇以限
水云

海道經一卷

浙江范懋柱家
天一閣藏本

史部

史部

七

不著撰人名氏惟書中揚子江一條自稱其名曰
璠其姓則不可考前有明嘉靖中應良序疑爲元
初人所撰而後人增修之今觀書末附朱晞顏鯨
背吟三十三首晞顏爲元人則此書亦出元人可
知矣其書言海路要害及占風雨潮汐諸事大抵
皆爲海運而作其後歌訣與今人所說亦同然未
免失之於太簡

海道經一卷

戶部尚書王際華家藏本

不著撰人名氏紀海運道里之數自南京歷劉家

港開洋抵直沽及閩浙來往海道凡舩泊遠近險
惡宜避之地皆詳誌之又有占天占雲占風占月
占虹占霧占電占海占潮各門蓋航海以風色爲
主故備列其占候之術疑舟師習海事者所錄詞
雖不文而語頗可據考海運惟元代有之則亦元
人書也後有海道指南圖乃龍江至直沽針路嘉
靖中袁褰以二本叅校刻入所編金聲玉振集復
錄元延祐間海道都漕運萬戶府海運則例圖至
正間周伯琦供祀記二碑附於其末

治河總考四卷 浙江范懋柱家天一閣藏本

明車璽撰璽宛平人成化戊戌進士官至河南按察司僉事是編考歷代治河之事以時代先後為次始周定王終明嘉靖十七年又以禹貢史記河渠書漢書溝洫志元史河源附錄宋濂治河議河南總志諸條列後其標題又稱山東兗州府同知陳銘續編前後無序跋不知孰為璽之原書孰為銘之所補體例參差刊刻拙陋蓋當時書帕本也

漕河圖志三卷 浙江鄭大節家藏本

明王瓊撰瓊有晉溪奏議已著錄先是成化間三原王恕作漕河通志十四卷宏治九年瓊以工部郎中管理河道乃因恕之書而增損之首載漕河圖次紀河之脈絡源委及古今變遷修治經費以逮奏議碑記罔不具悉明史本傳稱瓊出治漕河三年臚其事為志繼任者按稽之不爽毫髮由是以敏練稱蓋其書之切於實用如此惜原本八卷此本止存三卷非完帙矣

問水集三卷 浙江鄭大節家藏本

明劉天和撰天和有仲志已著錄嘉靖初黃河南徙天和以右副都御史總理河道乃疏汴河自朱仙鎮至沛縣飛雲橋又疏山東七十二泉自鳧尼諸山達南旺河役夫二萬不三月訖工詔加工部侍郎此書蓋據其按視所至形勢利害及處置事宜詳述之以示後人一卷末有治河本末一篇爲工部都水郎中鄆城楊旦所作以紀天和之績後四卷則皆其前後奏議之文也

通惠河志二卷附錄一卷

兩淮馬裕家藏本

明吳仲撰仲字亞甫武進人正德丁丑進士官至處州府知府通惠河卽元郭守敬所開通州運河明初湮廢糧皆由陸以運費重民勞仲以御史巡按直隸疏請重濬不數月工成遂至今爲永利其事詳見明史後仲外調處州時恐久而其法寢弛故於舟中撰此書奏進得旨刊行上卷載閘壩建置開濬事宜而冠以源委圖說中卷及附錄皆諸司奏疏下卷皆碑記詩章也

三吳水利論一卷

戶部尚書王際華家藏本

明伍餘福撰餘福有陝西志已著錄是書凡分八篇一論五堰二論九陽江三論夾苧干四論荆溪五論百瀆六論七十三漚七論長橋百洞八論震澤皆吳中水利要害大旨本宋單鏐所論而推廣之

新河初議一卷

浙江范懋柱家天一閣藏本

不著編輯者名氏明正德間河決徐沛運道淤塞特起盛應期往治之應期建議於昭陽湖東北進江家口南出留城口開濬百四十餘里較疏舊河

力省而利永計需夫六萬五千人銀二十萬兩剋期六月功成時胡世寧行取進京道經沛縣親觀情形因上疏與應期議合興役垂成爲言者所沮而罷應期坐奪職史稱後三十年朱衡循新河故跡成之運道終蒙其利則是舉不爲無見而言者爲媚嫉之口可知矣此編載世寧及應期原議開河疏並世寧請與應期同罪疏以見一事之始末以其事未竟功故但曰新河初議也應期字新徵吳江人宏治癸丑進士官至右副都御史事迹具

明史本傳世寧有奏議已著錄

浙西水利書一卷 浙江巡撫採進本

不著編輯者名氏錄前代治水文字凡奏記書狀疏論或問之類並列焉計宋文十九首元文十五首明文十二首而宋以前不採疑為未成之書其明文載至宏治間止則當為正德時所撰集也

膠萊新河議二卷 浙江范懋柱家天一閣藏本

明王獻撰獻字惟從號南澧又自號木石子咸寧人嘉靖癸未進士官山東巡察海運副使初元時

海運經由登萊避槐子口大石之險故放洋於三沙黑水厯成山正東踰登州東北又西北抵萊州海倉然後出直沽以達天津後於槐子口西之馬壕別開河道由麻灣抵海倉以達直沽鑿之遇石而止獻於元人所鑿之西燒石開道十四里麻灣以通於是江淮之舟可至膠萊餘三十里功未竟獻適遷去有撓之者 案明史孫應鼇傳稱為山東布政時有初開膠萊河議者應鼇力言不可則撓之者指應鼇也功遂不成獻因敘其案牘為一編以貽後來此書上卷是也其下卷則獻沒之後

膠萊人思其功祀之名宦工科給事中李用敬又理其說奏請續葺其事其後人又彙刻之附獻書以行云

吳中水利通志十七卷

浙江巡撫採進本

不著撰人名氏前七卷分序蘇松常鎮并杭嘉湖諸府之水而各以歷代修濬之跡附載於後次為考議二卷次為公移三卷次為奏疏三卷次為紀述二卷其敘事皆至嘉靖二年止每卷之末題嘉靖甲申錫山安國活字銅板印行安國嘗翻刻留

元剛所編顏真卿集及年譜蓋亦好事之家也

治河通考十卷

浙江汪啟淑家藏本

明吳山撰山高安人嘉靖乙未進士官至禮部尚書諡文端是書大旨謂河雖經數省而自龍門下趨則梁地當其衝故河患為甚前有自序云近日所刻治河總考疏漏混復乃重加校輯彙分序次一卷曰河源考二卷曰河決考三卷至九卷曰議河治河考末卷曰理河職官考上沂夏周下迄明代總為十卷前有崇禎戊寅其曾孫士顏序畧蓋

重刊時所作也

吳江水利考五卷 江蘇巡撫採進本

明沈啓撰啓字子由號江村吳江人嘉靖戊戌進士官至湖廣按察司副使是書大旨以吳江為太湖之委三江之首凡蘇松常鎮杭嘉湖七郡之水其瀦於湖流於江而歸於海者皆總滙於此故述其源委之要蓄洩之方輯為一編前二卷曰水圖考水道考水源考水官考水則考水年考隄水岸式水蝕考水治考水柵考後三卷皆水議考乃啓

晚歲家居所輯至

國朝雍正中其八世孫守義復為校正刊行江南通志稱其於水道最為詳核今觀其書於治水條規頗為明備於支派曲折尚不能一一縷載也

全吳水畧七卷 浙江范懋柱家天一閣藏本

明吳韶撰韶華亭人自號秦阜山人是書成於嘉靖戊戌首載蘇松七府為總圖次作捍海塘紀次列太湖三江及諸水源委凡疏導修築之事以及歷代官司職掌公移事實悉採錄之

兩河管見三卷

浙江范懋柱家天一閣藏本

明潘季馴撰季馴有司空奏疏已著錄此書乃其巡撫廣東時值兩河水決再以右都御史督理河道之所建白也首卷為圖說冠以敕諭二卷治河節解三卷為修守事宜其大旨與所撰河防一覽相同云

治水或問四卷

江蘇巡撫採進本

明龐尚鴻撰尚鴻字少襄南海人副都御史尚鵬之弟以貢入國學上書政府復獻飛車飛舟諸疏

得旨下部授鹽城訓導擢英山知縣時河決為祖陵患尚鴻撰進治河三策值巡撫與河臣議不合移怒尚鴻謫西安縣教諭終崑山縣丞蓋亦好事而兼好議論者也是編乃其在鹽城時講求治河方畧設為或問類次成書其力闢毀高堰之議大抵與潘季馴相合末附開澗河疏草一首則專論泗州祖陵利害云

新濬海鹽內河圖說一卷

浙江巡撫採進本

不著撰人名氏前有序畧云海鹽地勢卑下與海

沙平每潮水漲高出平地丈餘恃以障蔽者僅石塘石塘之內有裏土塘然猶不能禦潮必有內河以納過塘之潮而後洩其橫流之勢萬厯五年海溢鹽邑受害特甚是年遂開內河此編即詳記是役其說撮舉大要而圖則甚詳蓋海鹽知縣所刊稱於時巡撫浙江僉都御史為徐棧棧字世寅常熟人嘉靖丁未進士以劾趙文華坐謫者即其人後官至南京工部尚書題名碑錄作棧明史本傳亦作棧此本作拭刊板誤也

新河成疏

無卷數 浙江范懋柱家天一閣藏本

明工部都水郎中游季勳沈子木朱應時涂淵主事陳楠張純唐鍊同編初嘉靖四十四年七月黃河決浸沛縣諸處工部尚書朱衡與都御史潘季馴等相度地勢議於南陽至留城一帶別開新河自留城至白洋淺一帶則挑復舊河於時朝議不一然迄從衡議是編皆其前後案牘凡圖五奏疏十有一其稱古之治河惟避其害今之治河則又欲藉以通漕事與賈讓等異所言極為明晰又稱

居民之情在新河者則稱新河可開在舊河者則稱舊河可復皆為市廛之私非為國家運道之計亦究悉物情之言也

東吳水利考十卷

浙江巡撫採進本

明王圻撰圻字元翰上海人嘉靖乙丑進士官至陝西布政司叅議明史文苑傳附見陸深傳中其書首列東吳七郡水利總圖而書中所載止六郡於杭郡未之及也六郡中尤詳於蘇松常鎮四郡嘉湖則稍畧焉前九卷為圖考圖各繫以說後一

卷為歷代名臣奏議所采亦復寥寥圻以吳人而考吳地水利應無謬誤然謂錢塘江出寧波之赭山不知寧波別有赭山乃混而為一又引水經東至餘姚縣東入于海不知姚江源出大菁山逕寧波入海並不與浙江通均未免於疎舛

黃河圖議一卷

浙江范懋柱家天一閣藏本

明鄭若曾撰若曾有鄭開陽雜著已著錄是書所列上起河源下迄東海凡為五圖而以歷代防濬得失附論於後明代自嘉峪關外即為絕域無由

西越崑崙故所繪河源仍沿元史之誤至黃流湍
悍變態百出月異而歲不同區區一卷之書固未
可執爲定論也

治河管見四卷

兩淮馬裕
家藏本

明潘鳳梧撰鳳梧桐鄉人貴州籍隆慶庚午舉人
是編末有茅一桂跋稱爲安邊濟運本書蓋鳳梧
別有邊事一書合此書而總名之此則僅存其治
河書也書中多作歌括立名詭激而詞意實淺近
後載聘啟之類尤爲蕪雜

潞水客談一卷

兩淮鹽政
採進本

明徐貞明撰貞明字孺東一曰伯繼貴溪人隆慶
辛未進士官至尚寶司少卿其官工科給事中時
上疏言畿甸水利大旨開西北之溝洫以省東南
之漕運廷議不行會以他事外謫太平府知府不
能再疏理前說乃於通州旅次作此書設爲賓主
問答之辭以盡疏中之意前有萬曆丙子張元忭
序又有俞均重刊序及王祖嫡題詞末有李世遠
王一鶚二書李楨米鴻謨二跋皆盛推之然其後

貞明復官還朝再申前請廷議用其策卽命貞明領之迄不能成功而罷又明史汪應蛟傳載應蛟巡撫保定時奏與畿輔水利工部尚書楊一魁贊成其事神宗報許後亦卒不能行蓋持是議者皆妄冀水利一興卽北方之粟足供倉儲可以省南方之漕運而不知古今異勢南北異宜書生紙上之言固未可概見諸實事也

西瀆大河志五卷

兩淮馬裕家藏本

明張光孝撰光孝字維訓號左華自署關中人不

知爲何郡縣也是編志大河源委與決塞修濬之宜旁及祀典雜事藝文猶屬志書之體乃復摭入天河星象龍馬卦畫繪圖列說附會支離是與水官何涉乎

千金堤志八卷

浙江范懋柱家天一閣藏本

明謝廷諒周孔教姜宏範同撰廷諒字友可金谿人萬曆乙未進士官至順慶府知府事跡附見明史謝廷瓚傳孔教有中丞疏稿已著錄宏範臨川人仕履未詳千金堤在撫州府城東當汝水之衝

卽唐之千金陂屢有興廢萬曆五年知府古之賢率屬重修廷諒等因述此志以紀其事凡形勝沿革經畫人物各一卷藝文四卷則皆一時頌美之詞也

古今疏治黃河全書四卷 兩淮馬裕家藏本

明黃克纘撰克纘字紹夫晉江人萬曆庚辰進士官至工部尚書事迹具明史本傳是編乃其巡撫山東時所作分黃河考畧治河左袒三吳水利諸目所錄上起祖乙之圯耿下終萬曆三十二年蘇

莊之決末係以論陳當時便宜其大旨主於順河之性以疏之而歷陳明代河決未疏先塞之害其引漢武瓠子歌謂漢時河已通淮泗又引宋張洎疏以為禹貢九河之外原引一支南行入淮泗則未免出於附會也

河漕通考二卷 浙江巡撫採進本

明黃承元撰承元秀水人萬曆丙戌進士官至副都御史巡撫福建上卷論河防下卷論漕運皆上溯歷代下迄萬曆中年文頗簡潔而傷於太畧

海塘錄八卷 江西巡撫採進本

明仇俊卿撰俊卿海鹽人官國子監博士萬曆十五年海鹽塘潰重修俊卿因錄其圖式案牘為此書浙江通志已採錄其大畧其所紀述距今一百餘載亦今昔異宜矣

河渠志一卷 江蘇巡撫採進本

明吳道南撰道南字會甫崇仁人萬曆己丑進士官至文淵閣大學士謚文恪事迹具明史本傳萬曆甲午陳于廷建議修國史令翰林諸臣分門受

事道南領修河渠志此即其原稿也凡三篇曰運河曰黃河曰通惠河其餘皆未之及按明史藝文志作二卷則是本已非全帙矣前有總序謂冠以圖策載其領要今此書無圖蓋傳寫者失之考元史以前諸志皆無圖繪此例蓋道南所首創也

泉河史十五卷 安徽巡撫採進本

明胡瓚撰瓚有禹貢備遺增註已著錄是編圖紀一卷職制一卷泉源一卷河渠一卷職官表二卷泉河派表一卷疆域山川夫役漕艘官室人物秩

祀敘傳各一卷乃瓚分司南旺時據河志開河考
泉河志諸書刪輯而作於河湖閘壩隄防瀦洩之
道載之頗悉特體例冗雜尚有待於後人之潤色
耳末附泉河大事記一卷用編年體以總括全書
大畧亦近複贅又泉源志後有天啟二年主事薛
玉衡新開泉名二十七處則後人所續入也

皇都水利一卷

江蘇巡撫
採進本

明袁黃撰黃號了凡嘉善人萬曆丙辰進士官兵
部主事是編歷考北直隸河渠意在興修水利末

載畿內田制開田賞功沿海開田諸論大旨頗與
徐貞明潞水客談相近黃嘗任寶坻令縣賦繁重
具疏乞減故於畿輔利弊尤所究心卷首題前進
士袁黃編旁註云了凡雜著亦疑非完帙也

南河志十四卷

兩淮馬裕
家藏本

明朱國盛撰國盛字敬韜華亭人萬曆庚戌進士
官至工部尚書兼理侍郎事天啟五年國盛以工
部郎中管理南河創為此志自敕諭至公移凡二
十三門於黃淮諸水疏治事宜頗為詳析前有自

作序例一首又有李思誠徐標二序後有彭期生
跋思誠揚州人標與期生皆繼國盛董斯役者也

常熟水論一卷 編修程晉芳家藏本

明薛尚質撰尚質常熟人以白茅許浦福山三浦
為常熟宣洩所賴故作此以明其利害前有自序
言考當代名臣奏議及唐宋諸賢成說可以行於
今者凡若干條為之贊論以備於左復著水利論
一篇雜論十條以廁於末此本為曹溶學海類編
所載但有水利論及雜論而無所謂名臣奏議及

唐宋成說者蓋刪其前半非完書矣

黃運兩河考議六卷 浙江汪啟淑家藏本

不著撰人名氏首總論一篇次以歷代治河之事
編年紀載始唐堯迄明熹宗其大旨欲復九河故
道引全河北趨以歸海所謂紙上空談不達時變
與欲復井田封建同一迂謬耳

河紀二卷 山東巡撫採進本

國朝孫承澤撰承澤有尚書集解已著錄是書紀黃
河遷徙始末兼及畿輔水利大旨為籌畫漕運而

作

具區志十六卷 兩淮馬裕家藏本

國朝翁澍撰澍字季霖吳縣人是書以明蔡羽太湖志王鏊震澤編為本參酌增損續成此書於瀕湖港瀆區畫獨詳

北河續記八卷 浙江汪啟淑家藏本

國朝閻廷謨撰廷謨孟津人順治丙戌進士以工部主事督理河工是編因謝在杭舊志而修之又附錄古蹟藝文於其後廷謨自序謂刪其不宜於今

而增其正行於今者故所紀形勢頗詳然正行於今者增之是也其不宜於今者亦當存以備考證乃協志乘之體一概刊除非通論也

河防芻議六卷 直隸總督採進本

國朝崔維雅撰維雅新安人順治丙戌舉人初任儀封縣知縣陞淮安府同知調開封府南河同知以防河功授寧波府知府因總河王充裕請再遷管河道僉事官至布政使其成是書則為江蘇按察使時也大旨謂治河有七法曰引河曰遙堤日月

堤曰縷堤曰格堤曰護埽曰截壩前明潘季馴河防一覽詳於堤壩之說而不言引河維雅獨申引河之說蓋當河流悍激之地不得不濬此以殺其勢耳其書前爲總圖後爲分圖總圖所以審其形勢而分圖所以定其工程圖各有說所以明其致治之原維雅身歷河工二十餘年著爲此書其意見與靳輔頗不相合康熙二十一年河決蕭家渡維雅因上疏條奏河務斥輔所築減水壩爲不可用請變前法而更張之

上特遣大臣履勘復

召輔與維雅廷辨輔指列情形具陳維雅剽襲之謬維雅無以對卒從輔議而河患以息是其說亦多出於一偏之見不可據爲定論也

新劉河志一卷婁江志二卷

兩江總督採進本

國朝顧士璉撰士璉字殷重太倉州人先是順治十二年婁江塞水無所歸太倉知州白登明開鑿朱涇舊迹而水以安州人名之曰新劉河以婁江舊名劉河也士璉實佐是役故輯其始末爲志一卷

康熙辛亥再濬劉河之淤仍以士璉任其事工既竣乃復輯婁江志二卷上卷敘新績下卷考舊迹而以邳直邳僑諸人治水之書附焉新劉河志其稿本出登明士璉重輯之婁江志則士璉所自輯以其循登明之法而成功故亦題曰登明定不忘所自也前有王瑞國郁禾序皆稱為吳中開江書蓋當時二書合刊總題此名耳

山東全河備考四卷

江蘇周厚堦家藏本

國朝葉方恒撰方恒字學亭崑山人順治戊戌進士

官至山東濟寧道是編即其督理山東河道時所輯專言漕河之在山東者首圖志次河渠次職制次人文大致採掇明王恕漕河通志王瓊漕河圖志車璽漕河總考諸書而稍參以近時之形勢

明代河渠考

無卷數 浙江巡撫採進本

國朝萬斯同撰斯同有廟制圖考已著錄是書採取有明列朝實錄凡事之涉於河渠者悉按年編次天啟四年以後則雜取邸抄野史以足成之視史志所載稍詳然頗傷冗雜考斯同嘗預修明史此

本疑卽其摘錄舊聞備修志之用者後人取其殘稿錄存之也又兩江總督所採進亦有此書題曰明實錄河渠考所載止於萬曆四十八年知當時隨筆抄錄本未成書後來傳寫其稿者各據所見之本故多寡互異併書名亦小不同矣

今水經一卷

浙江巡撫採進本

國朝黃宗羲撰宗羲有易學象數論已著錄是書前列諸水之名共爲一表皆以入海者爲主而來會者以次附之如汴入河鄭入汴京入鄭索入京之

類自下流記其委也後各自爲說分南北二條皆以發源者爲主而所受之水以次附之如衛河出輝縣蘇門山逕衛輝府北東流淇水來注之又過濬縣內黃漳水來注之之類自上流記其源也其所說諸水用今道不用故道用今地名不用古地名創例本皆有法而表不用旁行斜上之體但直下書之某入海某某又入某頗不便檢尋又渭入河涇潼汧漆沮入渭洛入河灃澗伊入洛之類皆分條淇漳汶濇桑入衛清入淇沙易入濇温

渾入桑之類又合條則排纂之未善也其書作於明末西嘉峪東山海北喜峯古北居庸皆不能踰越一步宗羲生於餘姚又未親歷北方故河源尚剽元史之說而灤河之類亦沿明一統志之舊松花黑龍鳴綠混同諸江尤傳聞彷彿不盡可據我朝幅員廣博古所稱絕域皆入版圖得以驗傳聞之真妄

欽定西域圖志河源紀畧諸書勘驗精詳昭示萬代儒生一隅之見付之覆瓿可矣

明江南治水記一卷 編修程晉芳家藏本

國朝陳士鏞撰士鏞號宿峯秀水人康熙初以貢生閣試授主事是書大旨主於廣濬分支共受三江之水多為尾閭以殺震澤之怒故所錄惟以夏原吉議三條為主而况鍾李克嗣呂光海瑞許應達五事附焉非盡錄明一代治水之政也

湘湖水利志三卷 浙江巡撫採進本

國朝毛奇齡撰奇齡有仲氏易已著錄蕭山湘湖為一邑水利所資宋熙寧間縣民殷慶倡議建塘而

未行至楊時爲縣令始舉其役而明尚書魏驥修築之後爲豪民所沾御史何舜賓又以死爭復之舜賓之婿僉事富珫因作蕭山水利志歲久殘缺奇齡因其舊本補輯是編前二卷詳述湘湖沿革條約第三卷則附錄諸湖而終以湘湖歷代禁罰舊例其大旨以杜侵佔爲本

東南水利八卷

浙江巡撫採進本

國朝沈愷曾撰愷曾歸安人康熙壬戌進士官至山東道監察御史是書前四卷錄康熙以來太湖劉

河白茆孟河諸處興修開濬奏議公牘第五卷錄折解緩征議賑兵糧關稅諸奏議其目錄內自註有曰是卷內有無關水利因當事大臣仰體

主恩曲爲生民請命俾安樂利故載入蓋因水利而附錄者也第六卷七卷皆前代水利沿革於湖郡修築之外亦附錄賦額田稅均糧鹽口諸事蓋亦留心於民事者然志乘皆已具載此爲贅出矣

治水要議一卷

編修程晉芳家藏本

國朝孫宗葵撰宗葵有易宗集註已著錄此書載曹

溶學海類編中其議治河之法以築歸仁堤疏周家橋為主蓋亦執一偏之見未可坐論起行也

太湖備考十六卷

浙江巡撫採進本

國朝金友理撰友理字玉相吳縣人是書卷首為

巡幸圖說卷一總誌太湖卷二為沿湖水口濱湖山卷三

為水治水議卷四為兵防湖防論說記兵職官卷

五為湖中山泉港瀆都圖田賦卷六為坊表祠廟

寺觀古蹟風俗物產卷七為選舉鄉飲卷八為人

物卷九為列女卷十一為詩卷十二十三為文

卷十四為書目災異卷十五為補遺卷十六為雜

記大旨為明人太湖志震澤編皆詳於湖中而畧

於湖外以所重在名勝而水利兵防不及悉故以

此書補所闕云

蕭山水利書初集二卷續集一卷三集三卷附集一卷

浙江汪啟淑家藏本

初集明富珪編

國朝來鴻雯重訂續集三集皆

國朝張文瑞編附集文瑞之子學懋所編蕭山水利

以湘湖爲最溥明初其邑人御史何舜賓嘗以清
理佔田被禍玆爲舜賓婿因取章懋魏驥所輯水
利事蹟合梓以行以備考驗康熙五十八年有私
決湘湖者水利幾廢鴻雯據舊本重加訂正文瑞
又旁搜黃震萬柳堂記等文十二篇爲續集并刊
行之雍正十三年文瑞又以舊作西江塘湘湖紀
事稿二帙輯爲三集其附集則蕭山水利十條卽
明紹興知府賈應璧所撰圖說之舊本也

治河前策二卷後策二卷

浙江巡撫
採進本

國朝馮祚泰撰祚泰字粹中滁州人乾隆壬申舉人
是編乃其肄業中山書院所作分前策後策二集
前策三十篇皆詳述禹貢水道及歷代遷徙之迹
而評其得失後策十一篇皆條析現在利病前策
大旨主復北派放河使東入海自不病會通後策
大旨主閉南崖減水壩不引濁沙入湖添建北崖
減水壩另闢海口以洩其泛漲

水鑑六卷

福建巡撫
採進本

國朝郭起元撰起元閩縣人歷官盱眙縣知縣遷泗

欽定四庫全書
地理類
州知州宿虹同知皆積水爲患之區因卽所見聞
勒爲一編凡論十四篇說四十四篇策六篇考四
篇刻於乾隆癸酉其論淮徐一路皆身所閱歷之
言其他如江南浙江湖北山東諸水則亦傳聞之
論至於黃河源流一篇仍襲元人舊說尤未得其
真也

安瀾文獻一卷

兩江總督
採進本

國朝沈光曾撰光曾秀水人官高郵州知州是編輯
前明及

國朝修治南河大要分爲四篇一曰分黃二曰導淮
三曰利運四曰全下以皆錄前人奏議之詞故名
曰文獻其大旨在於劉老澗多設滾壩疏通汰河
以六塘清水道之使疾趨入海以治河於張福口
裴家場等處浚引河使洪澤之水盡出雲梯關以
治淮又繪圖冠於卷首末有乾隆十年重刻書後
一篇乃其病中所作謂潘季馴稱河不兩行乃泐
河未創中河未開以前以黃河爲運道故有是說
今則運道自清河桃源以上已無藉於黃河自宜

隨時籌畫又稱惟別穿一渠之說必不可行穿則
河水橫經運道挾之而走實有可虞黃壩新河之
陳迹足鑒云

右地理類河渠之屬五十二部二百四十六卷內二部無

卷數皆附存目

北邊備對一卷 江蘇巡撫採進本

宋程大昌撰大昌有易原已著錄是書前有大昌
自序稱淳熙二年因進講禹貢孝宗問以塞外山
川未能詳對紹熙中奉祠家居乃補撰此書以緣

起於講筵顧問故仍以備對為名凡二十一則皆
撫史傳舊文無所考正

江東地利論一卷 永樂大典本

宋陳武撰武始末未詳所論凡十篇首論東南北
古昔為最盛次論南北勝負之勢次論東南地勢
在江淮次論東南地勢在巴蜀次論合淝濡須攻
守之要衝次論襄漢荆南上流之重鎮次論襄陽
為江陵捍蔽次論壽春為江東捍蔽次論西臨關
隴東瞰青齊以取中原次論中外盛衰在於天時

大抵亦與江東十鑑相表裏蓋宋南渡後人人能為是言也

東南防守利便三卷 兩江總督採進本

宋陳克吳若同撰考宋史呂祉傳祉知建康與吳若等共議作此書上行在大畧謂立國東南當聯絡淮甸荆蜀之勢蓋專為南宋立言者也此本刊於明崇禎間前有祉進書繳狀一篇稱吳若為本府通判蓋其幕屬云

邊防控扼形勢圖論一卷 永樂大典本

宋江默撰默始末未詳其進書狀有云臣效官極邊四載考究今古地名形勢撰列邊防控扼形勢圖并論二十四首繕寫成冊皆是今日邊防急務不如此行則淮西不可守無淮西則長江不可恃昔三國吳無淮西亦守巢湖不敢退守長江以長江千里不可勝守而巢湖兩岸阻山中間阻水易守故也今日有兩淮何為退守池州江州棄巢湖之險哉其論亦剴切然不論攻而論守其作於和議之後歟

東關圖一卷 浙江巡撫採進本

明聞人詮撰詮有南畿志已著錄是編乃嘉靖壬辰詮為監察御史時巡視山海等關以涖任例取地圖而繪畫不免勞費乃取平原張祿舊時所繪諸圖重加校正刊以備閱所載關寨二百一十有二紀其道里遠近形勢險易頗詳詮即刊刻舊唐書者舊唐書明代幾佚其得重見於世者實詮之力較方從哲官內閣時竊謝承後漢書以出匿不示人遂致天地之間不復得見是書者其用心之

廣隘相去遠矣

修攘通考四卷 浙江巡撫採進本

明何鏜編鏜有括蒼彙紀已著錄此編以偽蘇軾地理指掌圖與桂萼明輿地圖許論九邊圖三書合而刊之別立此名更無一字之論著恐鏜之陋未必至是或坊賈所託歟

九邊考十卷 兩江總督採進本

明魏煥編煥字東洲長沙人嘉靖乙丑進士官兵部職方司主事是書作於嘉靖辛丑第一卷為鎮

成經畧以下分九邊為九卷而各邊之中又分疆域保障責任軍馬錢糧諸目所採多章奏案牘大抵紙上之談也

海防圖論一卷

浙江范懋柱家天一閣藏本

明鄭若曾撰若曾有鄭開陽雜著已著錄是圖乃若曾與唐順之所共定凡十二幅其式以海居上地居下乃畫家遠近之法若曾具為之辨胡宗憲所題為海防一覽者即此書也其書成於萬里海防圖之先蓋草創未詳之本後其六世孫定遠刊

海運圖說黃河圖議等編復併是書刻之云

萬里海防圖說二卷

浙江巡撫採進本

明鄭若曾撰是書乃若曾入胡宗憲幕府以後與同事邵芳取舊撰海防圖論復加考定起廣東歷福建浙江南直山東遼東計程八千五百餘里雜圖七十五各為之論若曾自序以為許默齋九邊圖論詳於西北此獨詳於東南云

江防圖考一卷

浙江范懋柱家天一閣藏本

明鄭若曾撰若曾既圖海防復為此書起九江至

金山衛凡爲圖十有九後備論沿江守禦兵弁之數及所當修補增置之法

江防考六卷

浙江汪啟淑家藏本

明吳時來撰王篆增補時來仙居人嘉靖癸丑進士官至左都御史諡文恪篆夷陵人嘉靖壬戌進士官至吏部左侍郎隆慶二年時來以南京僉都御史提督操江創爲此考六年篆奉命繼其任以時來書度之形勢微有不同因仍其體例增損重訂蓋明代以南京爲根本重地專設操江都御史

與勲臣一人同領其事所轄水操軍以萬計上自九江下抵蘇松通泰緩急咸責成之是考於形勝營制官兵沿革頗爲詳備蓋當時積習廢弛故立法特密云

兩浙海防類考續編十卷

浙江汪啟淑家藏本

明范涑撰涑字原易休寧人萬曆甲戌進士官至福建右布政使自嘉靖中倭寇犯兩浙沿海郡縣被害最深故守土者以海防爲首務胡宗憲作籌海圖編後續之者有海防考海防類考諸書而沿

革不常每有闕畧萬曆二十九年涑官海道副使因取諸書復加增廣故名曰續編前有史繼辰序并類考舊序二首凡四圖四十一目於兵衛巡防餉額各事宜頗爲詳備惟多錄案牘之文未免時傷冗漫耳江南通志列涑於儒林傳中載所著有休寧理學先賢傳范子嚙言晞陽文集獨不及此書蓋自宋以來儒者例以性命爲精言以事功爲霸術至於兵事尤所惡言殆作志者恐妨涑醇儒之名故諱此書歟然古之聖賢學期實用未嘗日

日畫太極圖也

溫處海防圖畧二卷

浙江汪啟淑家藏本

明蔡逢時撰逢時字應期宣城人萬曆庚辰進士官溫處兵備副使溫處爲兩浙海疆門戶明季倭寇出沒號曰要衝逢時此書作於萬曆二十四年皆據當時文移冊籍編次成帙凡地圖船械以及戰守選練之法無不畢載共爲圖四子目四十有三

籌海重編十卷

兩淮馬裕家藏本

明鄧鍾撰鍾字道鳴晉江人萬歷二十年倭大入朝鮮海上傳警總督蕭彥命鍾取崑山鄭若曾籌海圖編刪其繁冗重輯成書冠以各處海圖次記奉使朝貢之事又分按沿海諸省記其兵防制變各事宜而以經畧諸條終之於前代舊事亦間有引証前有彥序一篇極稱胡宗憲功蓋宗憲倚趙文華勢攘張經血戰之功固難逃清議而其所自設施亦頗著勲勞受禍以後衆怒平而公論定固有不容盡沒者也

海防圖論一卷

浙江范懋柱家天一閣藏本

不著撰人名氏所載惟江南浙江山東遼東而福建直隸諸省沿海之地並無圖說疑其有缺佚也

陝西鎮考一卷

浙江范懋柱家天一閣藏本

不著撰人名氏畧記陝西諸鎮城堡之屬大抵從王圻續文獻通考邊防門中錄出蓋明人所爲也

海防述畧一卷

浙江范懋柱家天一閣藏本

國朝杜臻撰臻有閩粵巡視紀畧已著錄是書臚列沿海險要形勢及往來策應諸地於諸洋列戍哨

探事宜亦併及之按臻於康熙二十一年奉

詔偕內閣學士石柱往閩粵定疆理茲書蓋其時所著也

延綏鎮志六卷

內府藏本

國朝譚吉璫撰吉璫字舟石嘉興人由內閣中書官

至登州府知府明時以延綏爲重鎮設重兵以防
河套

本朝順治初年罷延綏巡撫不設而延綏鎮尚仍舊
名康熙十二年吉璫以延安府同知分駐榆林城
乃因明巡撫涂宗濬舊本重修此志自圖譜至藝

文凡分十二類所載皆明代邊防之事

蠻司合志十五卷

浙江巡撫採進本

國朝毛奇齡撰奇齡有仲氏易已著錄是編皆紀明
代土司始末凡湖廣一卷貴州二卷四川四卷雲
南四卷兩廣四卷亦其修史所餘之稿也

江防總論一卷海防總論一卷

編修程晉芳家藏本

國朝姜宸英撰宸英字西溟慈谿人康熙丁丑進士
官翰林院編修已卯充順天鄉試副考官爲正考
官修撰李蟠所累逮問蟠遣戍宸英十於獄是二

書載曹溶學海類編中各冠總論於前而條繫其形勢之畧於後題曰附錄案江防論末稱依海道所經自廣東西路始福建浙江江南登萊天津衛遼陽以次及之又括海南所經各省郡縣自爲一卷與論後所附錄全不相應又稱其沿海山河寇鯨入犯分合日本輿地皆有圖今亦無圖知曹溶刪節其文非宸英之原帙也

秦邊紀畧四卷

直隸總督採進本

不著撰人名氏書中首卷河州條注內有西夷部

落三十有奇康熙十四年圍衛城一月康熙二十二年又犯衛地之語又四卷近疆西夷傳內載康熙二十四年祝囊同科爾坤十八部由古北口入覲事則此書爲康熙間人所作首載河州及西寧莊浪涼州甘州肅州靖遠寧夏延綏等衛形勢要害次載西寧等衛南北邊堡次載西寧等衛近疆及河套次載外疆近疆西夷傳河套部落蒙古四十八部落考畧西域土地人物畧其論邊鄙疆域及防守攻剿情形一一詳悉蓋

國家初定西陲中間遘王輔臣之叛與巽黔相煽方
用兵於內地故近邊諸部往往竊窺後乃以次削
平馴為臣僕此書所述皆是時之形勢方今

聖武遠揚天山南北二萬餘里皆置郡開屯歸我疆宇
昔之所謂險要者今皆在戶闥之間昔之所謂強
梁者今皆隸賦役之籍此書所述皆無所用之然
在當時則可謂留心邊政者矣至北邊四十八部
源委弗詳且非秦地其西域道里以驛程考之亦
皆在茫昧之間蓋一時得之傳聞附錄卷末均不

足為典要存而不論可矣

右地理類邊防之屬二十一部八十三卷皆附存目

卷一